

名媛詩選翠屢集










831.6
7738
25

序

原夫歌詠之興興於宮壺辭華之豔豔於釵羣列國因之而有風尼山用是以垂戒秦漢而還何代蔑有昭明之選不遺聲韻于瓊裾玉臺一編純借藻思於彤管香籟官體唐宋人擅此名家雖不無淫蕩之言然下世冥頑士人鹵莽未必非性情之鍼砭也有明三百年間閨閣琅函幾成瀚海讀之有令人心動者因輯爲一書名曰翠樓集正想其春日凝粧新愁不解誰與傳也握是編者甯老死於溫柔鄉耶抑直取封侯臥沙場而不作兒女子態耶淮南劉云份撰




名媛詩選

翠

樓

集

清·劉雲份撰



第一輯

第二十四種

據野香堂原刊本排印
貝葉山房張氏藏版

本書封面題簽：凌叔華先生



翠樓集

初集目錄

劉王煥二首

陳德懿一首

孟淑卿六首

少卿妻一首

潘氏十首

朱靜菴六首

鄒賽貞四首

王素娥四首

楊玉香四首

黃氏二首

馬孺人四首

儲氏一首

戴伯璘一首

鄧氏一首

李玉英一首

桑貞白一首

梁善娘一首

姚青蛾六首

素蘭三首

王虞鳳一首

陳玉一首

金陵妓二首

尹紱榮三首

馬守真一首

李秀二首

許景樊廿五首

李淑媛四首

成氏二首

汝舟妻二首

權貴妃一首

德介氏一首

端淑卿三首

楊氏一首

陸娟一首

項蘭貞一首

王鳳嫻八首

張引元十首

張引慶八首

陳氏一首

景翩翩七首

舜 玉二首

陸卿子廿三首

徐 媛十三首

張嫺婧十首

小 青十一首

朱 瀾一首

孔 氏一首

趙今燕六首

文光妾一首

周 文一首

朱泰玉一首

張 回一首

梁玉姬三首

楊 宛一首

齊景雲一首

方 氏一首

林奴兒一首

王 玄一首

王 微廿二首

王 賽玉一首

方孟式十一首

吳令儀三首

吳令則二首

薛氏四首

龍輔六首

沈宜修四十首

葉紈紈十四首

葉小鸞卅六首

張倩倩四首

紀映淮一首

倪瑞三首

吳綃五首

浦映淥三首

周珊珊三首

余珍玉二首

余尊玉五首

王曇影十二首

翠樓集初集目錄終

翠樓集

二集目錄

沈瓊蓮二首

楊文儷一首

錢氏女一首

馬閒卿一首

方孟式二首

方維儀六首

周玉簫一首

鄭允端一首

張紅橋十一首

田娟娟二首

斗娘四首

董少玉五首

呼文如三首

周潔二首

馬氏六首

屠瑤瑟三首

沈天孫三首

金少光一首

袁九淑二首

鄧氏一首

王虞鳳一首

劉苑華二首

沈紱蘭二首

黃雙惠三首

黃淑德四首

項蘭貞三首

武氏二首

鄧大妙一首

劉雲瓊一首

梅生一首

田玉燕二首

虞淨芳一首

王鳳嫻三首

周慧貞三首

董氏婦三首

張嫻靖四首

翁孺安一首

袁彤芳四首

黃鴻一首

吳山一首

周蘭秀四首

楊若仙一首

許氏一首

黃嗣真一首

黃幼藻三首

姜氏一首

劉玄芝一首

王微四首

朱斗兒一首

朔朝霞一首

周青霞一首

趙麗華一首

景翩翩八首

趙今燕一首

朱泰玉二首

鄭妥四首

馬珪二首

馬如玉一首

崔嫣然二首

郝文珠一首

沙宛在二首

薛素素一首

周文六首

謝五娘五首

梁小玉二首

羽孺二首

楊宛七首

雜詩九首

翠樓集二集目錄終

翠樓集諸名媛族里

劉王煥

字懜初。洞庭葉正甫妻也。夫久客都下。劉以衣寄之。并侑以詩。

陳德懿

仁和人。都御史李昂之妻。道州守士魁之母。父敏政。南康郡守。陳通達往典。諳練時務。晚年工詩。著作甚富。

孟淑卿

蘇州人。別號荆山居士。訓導孟澄之女。嘗論作詩。須脫胎化質。僧詩貴無香火氣。女詩貴無鉛粉氣。朱淑貞固有俗病。李易安差可與語耳。識者然之。

陳少卿妻

溫州人。少卿宦京師。爲妾所惑。棄妻於家。妻作古詩寄之。以志感諷悲切之意。

潘氏

台州人。山東提學潘應昌之女。貢士裘致中之妻。自署其稿曰碧天道人。

朱靜菴

海寧人。尙寶卿朱祚之女。嫁教諭周濟爲妻。幼穎悟。工詩。年至八十餘卒。有集十卷。嘗讀易安詞。題云。一代才華真可惜。錯將閒恨寄新詩。亦以所配非偶。每形諸吟詠。有籬落見梅云。可憐不遇知音賞。零落殘香對野人。蓋自傷也。

鄒賽貞

當塗人。國子監丞濮未軒之妻。子韶。舉進士。官編修。女秀蘭。適大學士鉛山費鵝湖。鄒少聰慧。博雅好吟。每有奇句。見者以爲無愧能言之士。因號曰士齋。有士齋詩三卷行世。

王素娥

山陰人。號蘂齋。吏人胡節之妻。節歿京師。王以死自誓。

黃氏

四川遂寧人。黃簡肅公珂之女。新都楊修撰用修繼室也。用修戍滇。黃留蜀中。故所作詩多寄遠感懷。名曰楊狀元妻詩。

馬孺人

翰林陳石亭繼室。陳失配。知馬賢而有文。遂娶焉。年八旬。不廢吟詠。書法得蘇長公筆意。所著有芷居稿。

儲氏

秦州人。文懿公瓘之女。嫁興化舉人成學。

戴伯璘

侯官人。戴貴之妹。

鄧氏

名鈴字德和。閩縣人。儒士鄭垣妻也。垣卒。刲雙耳自誓。嘉靖初。旌節婦。著有風教錄。

李玉英

順天人。錦衣千戶李雄女也。雄卒。繼母焦氏以送春別燕二詩。誣玉英奸淫不孝。下獄置極刑。玉英婉麗有才。獄中具書。令妹桃英陳其事。朝廷憐其冤而釋之。置焦氏於法。

桑貞白

號月窗。嘉禾人。周履靖繼室。著香奩集一卷。茅鹿門爲之序。

梁善娘

番禺縣人。梁真祐女。色美。未得令終。

姚青峨

嘉之秀州人也。自號青峨居士。年十七。歸范君和。才德兩全。舉一子。二十六卒。有玉鴛閣

集屠隆爲序。

王虞鳳

字儀卿。侯官人。許嫁林氏。年十七卒。有罷繡吟一卷。

陳玉

世里無考。

尹紱榮

各級榮。四川宜賓人。尹仲子求之女。適解元劉晉仲。劉有妹文玉。能詞翰。尹悅而好之。相與爲友。遂學爲詩。精神起落。常出人外。十九而卒。晉仲發其所藏。全缺並存之。號斷香集。

李秀

會稽人也。幼攻書史。年及笄。適於燕客。偶過新嘉驛。題怨辭於壁上。

許景樊

字蘭雪。朝鮮人。八歲作廣寒殿玉樓上梁文。長適進士金成立。後金殉國難。許遂爲女道士。其兄許筠。狀元。次許篈。正郎。樊之才名。與兄並著。金陵朱蘭嶼太史出使朝鮮。購其全集。刻行於世。

李淑媛

自號玉峯主人。朝鮮人。承旨學士趙瑗妾。遭倭亂。死之。

成氏

朝鮮氏。

俞汝舟妻

姓氏未傳。

權貴妃

高麗人。

端淑卿

當塗人。教諭端廷弼女。適芮氏。賦性幽閒。天資穎悟。所作詩詞。大類唐人。有綠窗詩稿。德清章元禮稱其旨醇而節和。颯颯有致。足稱鄒士齋流亞。

陸娟

華亭陸德蘊潤玉之女也。後歸馬龍。

項蘭貞

字孟晚。樵李黃卯錫之妻。解元孟瀾之母也。所著有裁雲月露二草。

王鳳嫺

張引元

張引慶

字瑞卿。號文如子。華亭人。王解元獻吉之姊。張進士本嘉妻也。垂髫時。大父試以駢句云。秀眉新月小。卽應聲曰。鬢髮片雲濃。雲間范濂評其詩曰。高華絕響。錢劉清新。迥出溫許。長女引元。字文姝。又字蕙如。楊安世妻。年二十七卒。范濂序曰。爾雅俊拔。類劉長卿風骨。非但無宋

人烟火氣。卽長慶西崑諸體。皆不逮也。次女引慶。字媚姝。亦工翰藻。母子自相倡和。有貫珠集。焚餘草。雙燕遺音。行於世。

陳氏

閩人。潘進士仲徽室。有閨中集。

陸卿子

長洲人。寒山趙凡夫室也。秉性雅澹。不事繁飾。與趙結廬山中。繡佛長齋。吟詠無間。超然遺俗。所著有考槃玄芝二集。

徐媛

字小淑。吳縣人。副使范允臨妻也。髫年嗜學。曉暢書義。喜於吟詠。著絡緯集十二卷。

張嫺婧

字蓼仙。廬陽六安人。文士閔而學之妻。志遠氣俠。不異烈丈夫。著作甚富。有竹經。鶴史。遣

疾草諸書。止蕉窗遺韻行世。

小青

本傳云。虎林某生姬也。家廣陵。與生同姓。故諱之。僅以字行云。或謂合來是一情字。乃好事者所著。托名以傳耳。未知孰是。

孔氏

洞庭人。適武山張氏。

劉文光妾

氏里無考。

方氏

錢塘人。方將軍心瀛女。曹舜玉之妻也。恭婉好文翰。從舅任之桐江而殞。所遺詩文。自名

如玉集。

王微

字修微。廣陵人。常輕舟載書。往來五湖間。自傷七歲。父見背。致飄落無所依。眉嫵間常有恨色。其詩娟秀幽妍。與李清照朱淑真相上下。著遠遊篇。閒草。期山草行世。

方孟式

字德耀。桐城人。廣東右布政張公秉文之妻。父廷尉卿。母姚恭人。弟兵部侍郎孔炤。方天資穎敏。篤志詩書。所著有級蘭閣集八卷。

吳令儀

字棣倩。皖桐人。左諭德公應賓之仲女。尙寶方公孔炤之妻也。資慧德閒。不幸早世。親黨輯其遺稿以傳。

吳令則

棣倩之姊。茂才何應瓊妻。

薛氏

嗣詳

龍輔

蘭陵守元度公之後也。適武康常陽。隨任太平官舍。所著有女紅餘志。

沈宜修

葉紈紈

葉小鸞

字宛君。吳江人。山東副使沈琬女。工部葉公紹袁妻也。長女紈紈。字昭齊。次女小紈。字蕙綢。季女小鸞。字瓊章。母女皆多才。倡和極富。有鷓鴣吹愁言等編。俱載午夢堂集。

張倩倩

吳江沈君庸之妻。卽宛君表妹。

紀映淮

金陵人。莒州諸生杜李妻也。壬午城破。夫被難。淮與姑先避深山洞中。毀面覓衣食供姑。

得不死。身與六歲兒皆忍飢凍。栢舟三十餘年。以節孝旌閭。詩係少時作。稱未亡。曰。此非婦人事也。少作誤爲人傳。悔不及。遂絕筆不作。

倪瑞

字文嘉。廣陵人。適里中趙國俊爲室。有詩稿一卷。存友人處。惜未梓行。

吳綃

字片霞。號冰仙。長洲人。琴川進士許文玉室也。有嘯雪庵詩二卷。未刻。

浦映淥

字湘青。無錫人。世居前澗。詩名籍甚。武進進士黃雲孫妻也。有繡香小集行世。

周珊珊

字小玉。黃雲孫聘姬也。未嫁而殞。一時名彥。競爲詩挽之。

余珍玉

字席人。福建玉田人。進士起潛公孫女。

余尊玉

字其人。卽席人妹。父兆昌。早亡。無嗣。母陳氏。卽以其人爲子。幼令服男衣冠。延師與姊讀書。俱聰慧。能文章。善詩畫。年十二。學益進。能應對賓客。四方名流咸締交焉。時雲間宋轅文司閩學政。其人聲名赫奕。欲出應試。或尼之而止。是歲。卽許字某氏。衣冠如故。但不令應對賓客耳。所著有綺窗逸韻一卷。

王曇影

字文娟。浙蘭溪人。隨父寄居廣陵。年十四。工蘭善弈。精曉梵典。許字劉生。青夕爲侍者。將次于歸。倏爾謝世。豈瑤宮淨質。不欲受塵凡點染耶。秦淮野遺龔子。爲詩弔之。以示青夕云。應笑人間有絕癡。故來塵坱弄嬌姿。輕如白雪乘春氣。不見分明入手時。又不是穠桃艷李人。肯將環珮委風塵。他生倘遂今生約。且在今生種想因。青夕斷腸詩之刻。以此。

楊玉香

金陵青樓女也。年十五。色藝絕羣。不與俗偶。貴游慕之。卽千金不肯破顏。閩縣林景清與其姊邵三狎。題詩壁上。玉香見之。擊節嘆賞。援筆欲和。適景清外至。一見魂銷。詩篇酬倡。兩情相許。交歡之夕。則玉香仍處子也。後林歸去。楊潔身以待。以一清自名其軒。越六年。景清北上。月夜舟泊白沙。忽於月下見一女子。迫視之。乃玉香也。且驚且喜。玉香曰。自君別後。天各一方。是以買舟南下。期續舊好。不意於此邂逅耳。天將曙。遂不復見。景清疑懼累日。至金陵。訪一清軒。則玉香死一月矣。景清大駭。入臨其喪。號慟不勝。是夜獨宿軒中。彷彿見玉清從帳中出。晞噓良久。景清不覺失聲呼之。遂隱隱而沒云。

素蘭

名孺。字靜和。不詳其邑里。或曰素蘭解音律。推律得羽聲。遂自命爲羽氏。能書。善畫蘭。喜蒔蘭蕙。故以素蘭自號。

馬守真

又名月嬌。號湘蘭。秦淮人。工詩善蘭。爲世所重。王百穀序其集。稱之曰。輕泉刀若土壤。居然翠袖朱家。重然諾如丘山。不忝紅粧季布。

德介氏

高麗妓。

楊氏

金陵妓。學詩於陳編修魯南門。

景翩翩

字三昧。建昌風塵中人也。窮困而死。詩名散花吟。

舜玉

姓姜氏。工詩。善楷書。金陵妓。

朱瀾

字碧波。金陵教坊司女。

趙今燕

名彩姬。南曲中與馬湘君齊名。張幼于中秋賦詩。有試從天上看河漢。今夜應無織女星之句。今燕用是名。冠北里。

周文

字綺生。嘉興人。嘗有詩曰。掃眉才子多相忌。未敢人前說較書。蓋自傷也。

朱泰玉

名無瑕。桃葉渡邊女子。幼學歌舞。長通文墨。秦淮建大社。會集天下名士。泰玉詩出。人皆自廢。有繡佛齋集。

張回

字淵如。號觀若。金陵妓。

梁玉姬

名小玉。武陵人。七歲依韻賦落花詩。八歲摹大令帖。長而涉獵羣書。作兩都賦。半載而就。著娜嬛集三卷。其和冷香字韻詩。幽情欲絕。

楊宛

字宛叔。長干人。能詩。有麗句。善草書。歸苕上茅止生。

齊景雲

直隸人。善琴能詩。對人雅談。終日不倦。與士人傅春定情後。不復見客。春謫戍遠方。錦雲不得隨。蓬首垢面。閉戶不出。日讀佛書。未幾痛歿。人咸異之。

林奴兒

金陵妓。姿容嫵媚。名流傾慕。

王玄

王賽玉

玄字玄卿。玉字儀卿。俱金陵烟花女也。二人名噪一時。有王家卿卿之號。又稱院中二王。

翠樓集族里終

翠樓集

淮南劉云份平勝選訂 亦號青夕

製衣寄夫

劉王煥 字懷初

情同牛女隔天河。又喜秋來得一過。歲歲寄郎身上服。絲絲是妾手中梭。剪聲自覺和腸斷。線脚那能抵淚多。長短只依當日樣。不知肥瘦近如何。

夢

夢和殘月過樓西。月過樓西夢已迷。喚起一聲腸斷處。落花枝上鷓鴣啼。

春草

陳德懿

無人種春草。隨意發芳叢。綠遍郊原外。青回遠近中。罩烟沾落絮。和雨襯殘紅。不解王孫去。淒淒對晚風。

題畫

孟淑卿

別號荆山居士

嶺樹盤雲轉。溪紆路亦斜。晚來烟藹合。無處認山家。

對鏡

清晨對鳳奩。含情強粧束。既已命如塵。何須顏似玉。

春歸

落盡棠梨水拍堤。萋萋芳草望中迷。無情最是枝頭鳥。不管人愁只管啼。

長信宮

滿階紅葉鴈聲頻。永巷秋深最愴神。君意一如秋節序。不教芳艸得長春。

登樓

爲憐春去不登樓。纔上南樓動遠愁。滿地落花紅雨亂。接天芳草綠雲稠。

悼亡

斑斑羅袖濕啼痕。深恨無香使返魂。荳蔻花存人不見。一簾明月伴黃昏。

寄外

陳少卿妻

野鷄毛羽好。不如家鷄能報曉。新人貌如花。不如舊人能績麻。績麻做衫郎得着。眼見花
開花又落。

題畫

潘氏 別號碧天道人

屋傍青山下。人歸蒼莽中。未開雲外戶。先聽水邊松。

月下思

孤舟橫野渚。明月照當空。十年江海意。疑在小亭東。

蓮塘

溪水流東去。垂楊對我門。淒涼斷橋路。殘月照黃昏。

涼秋夜月

寒月悠悠靜。窗前慘淡風。荒山黃葉舞。秋色滿江中。
風灑小園竹。珊珊琅玕玉。月白長空宵。冷光侵碧綠。
暮雲棲野樹。秋水蕩寒波。板橋明月夜。織女渡天河。

夜坐讀周南

獨坐難禁夜色寒。滿窗新月度春殘。臨文徒媿無經濟。只把關雎仔細看。

秋詞

翩翩黃葉落江風。月滿江亭秋夜空。黃菊酒香人已醉。白蘋江冷度哀鴻。

咏柳

烟柳青青葉已齊。半簾紅日小鶯啼。玉樓人靜悲橫笛。惟有東風吹向西。
剪剪輕風三月天。如絲楊柳滿庭前。子規驚動深閨夢。起捲朱簾看翠烟。

春睡詞

朱靜菴

茸茸芳草含新綠。露井天桃錦雲簇。畫闌干外早鶯啼。又喚春光到華屋。綺窗花影搖玲瓏。玉人夢破春溶溶。雲鬢半蟬鳳釵滑。枕痕一縷消輕紅。香汗輕輕透衾濕。今情欲起嬌無力。海棠庭院鳥聲知。睡足東風一竿日。

竹枝詞

西子湖頭賣酒家。春風搖蕩酒旗斜。行人沽酒唱歌去。踏碎滿塔山杏花。橫塘秋老藕花殘。兩兩吳姬蕩槳還。驚起鴛鴦不成浴。翩翩飛過白蘋灘。

暮春即事

落花如雪點蒼苔。深掩重門晝不開。蝴蝶不知春已去。又隨飛絮過牆來。

初夏

落盡殘紅日正遲。薰風一夜折薔薇。池塘雨過無人到。滿地榆錢鶯亂啼。

染甲

金盤和露搗晴霞。紅透纖纖玉筍芽。翠袖籠香理瑤瑟。綠陰新綻海棠花。

傷春

鄒賽貞

號士齋

誰憐情思苦。鎮日掩柴扉。紫燕依梁語。殘花帶雨飛。懶眠翡翠幙。愁織鴛鴦機。春色重相見。遠人猶未歸。

瓊林宴

聖主恩榮宴相才。穀中英俊總追陪。喜酬司馬簪花志。敬仰神堯祝壽杯。鐘鼓鏗鏘迎瑞靄。蛟龍變化蟄春雷。長安道上人如簇。爭看仙郎御讌回。

題菊

不共春光鬪百芳。自甘籬落傲風霜。園林一片蕭疎景。幾朵依稀散晚香。

中秋懷婿

銀漢無聲夜夜清。良辰忽感宦游情。東山遙望人千里。想亦停杯對月明。

悶懷

王娥 號蕤齋

妾淚非易彈。鄉關渺千里。心事與愁腸。相對何人語。

渡錢塘上

風微月落早潮平。江國新晴喜不勝。試看小舟輕似葉。載將山色過西陵。

黃昏

塔下蛩吟又暮秋。倚欄獨立恨悠悠。幾多心事三年淚。忍向珊瑚枕上流。

獨愁

黃昏愁聽雨瀟瀟。挑盡殘燈夜寂寥。針線不拈腸欲斷。薰籠香冷火應消。

答林景清

楊玉香

銷盡爐香獨掩門。琵琶聲斷月黃昏。愁心正恐花相笑。不敢花前拭淚痕。

留別

雁杳魚沉各一天。爲君終日淚潸然。孤篷今夜烟波外。重訴琵琶了宿緣。

鶯鶯

黃氏

春風戶外花蕭蕭。綠窗繡屏阿母嬌。白玉郎君恃恩力。尊前心醉雙翠翹。西窗月冷濛花霧。落霞零亂搖牆樹。此夜靈犀已暗通。玉環寄恨人何處。

寄外

雁飛曾不到衡陽。錦字何由寄永昌。三春花柳妾薄命。六詔風烟君斷腸。日歸日歸愁歲暮。其雨其雨怨朝陽。相聞空有刀環約。何日金鷄下夜郎。

暮秋

馬孺人

野色滿園中。閒情立晚風。菊花含雨艷。楓葉醉霜紅。

有感

春風零落後。秋圃恨開遲。總是宜男草。傍人也未知。

謝寄鞋

金蓮小瓣墜瑤池。想像深閨繡繡時。無限巧心勞遠寄。露多不忍下塔墀。

七夕

靈鵲成橋事有無。人間今夜憶星姑。倚窗坐久愁聲動。一葉西風到碧梧。

雨後詠桃

儲氏

天桃灼灼倚窗前。春色繽紛帶紫烟。昨夜雨聲來枕上。惜花人聽不曾眠。

和林生

戴伯璘

風透紗窗月影寒。鬢雲撩亂晚粧殘。胸前羅帶無顏色。盡是相思淚染斑。

秋夜聞笛

鄧氏

淒風颯颯滿江城。雁叫霜天月正明。永夜蕭條多少恨。不堪更聽斷腸聲。

送春

李玉英

柴扉寂寞鎖殘春。滿地榆錢不療貧。雲鬢衣裳半泥土。野花何事獨撩人。

春繡

桑貞白 號月窗

一番風雨動春寒。庭畔梨花已半殘。燕語隔簾人寂寂。金盤滌手繡青鸞。

寄鍾師周

梁善娘

拋下金針罷錦機。多情人遠費相思。惱懷最是雙雙燕。不識人愁花畔飛。

村居

姚青峨

數椽竹屋占晴沙。碾破烟容雲徑賒。漫着水沉拈野月。蛩聲淒老白蘋花。

竹枝詞

賣酒家臨烟水濱。酒旗挂出樹頭春。當鑪十五半遮面。一酌清泉能醉人。
燕晴花煖春色饒。游情欲醉魂欲消。紅衣笑展綠陰畔。接袖紛紛渡小橋。

題夢

半床蝴蝶迷春思。一枕離魂逐夢飛。密帳重帷關不住。月斜樓上伴情歸。

雨

簾捲輕寒春帳空。夢殘芳草雨催風。隔窗陣陣聲偏急。狼籍庭中一夜紅。

幽居即興

藕花脫盡秀芙蓉。處處村聲急夜春。明月一簑清雨斷。忽聞烟外落殘鐘。

懷人

素蘭

深竹傍芳檻。蕙蘭香在漪。美人隔湘水。公子江之湄。繡戶長相憶。陽臺未有期。魂招靡可鏡。鏡塵知爲誰。視彼雙飛鳥。頻來歇故枝。何如薄命妾。年年傷別離。幽徑尋芳草。王孫知未知。西風吹雁去。說向羽林兒。

新柳

草閣疎林迥。簷前遶亂楊。章臺隣御苑。灞岸惜他鄉。繫馬新絲弱。藏鶯舊線黃。玉關頻寄

去。離思逐條長。

代婿懷美人

雲鬢纖整玉搔頭。疑是飛瓊下玉樓。爲避風高臺早築。臨風更重惜花愁。

春日閒居

王鳳虞 字儀卿

濃陰草色罩窗紗。風送爐香一縷斜。庭草黃昏隨意綠。子規啼上木蘭花。

題賈似道湖山圖

陳玉

山上樓臺湖上船。平章醉後懶朝天。羽書莫報樊城急。新得蛾眉正少年。

詠骰子

金陵妓

一片寒微骨。翻成面面心。自從遭點染。拋擲到于今。

送友

送郎挾彈出平康。妾贈金丸賽夜光。若過橫塘秋水上。莫教容易打鴛鴦。

巫山峽

尹紉榮

一往深如許。孤光拖積翠。滿江波聲急。十二峯清媚。少焉岸如劈。孤烟頂上膩。瀑布吹晴雪。響與江聲二。

深夜坐吟

漠漠長空似水清。金波淨滑月輕盈。微風半夜添衣冷。弱柳千枝帶露明。滿院春容鎖不住。一番花信爲誰驚。沉吟深夜愁無緒。金鴨香寒畫竹橫。

雨後江望

雨後水更明。秋風漸漸聲。寒天白露滿。江上曉烟橫。

和銜生

馬守真 號湘闌

長虹帶映竹邊樓。樓外烟光望裏收。一水盈盈人不見。數聲腸斷雁橫秋。

題新嘉驛壁

會稽女子 李秀

銀紅衫子半蒙塵。一盞孤燈伴此身。却似梨花經雨後。可憐零落舊時春。
萬種憂愁訴與誰。對人強笑背人悲。此詩莫把尋常看。一句詩成千淚垂。

有所思

許景樊 字蘭雪

朝亦有所思。暮亦有所思。所思在何處。萬里路無涯。風波苦難越。雲雁杳何期。素書不可託。中情亂若絲。

古別離

麟麟雙車輪。一日千萬轉。同心不同車。別離時屢變。車輪尙有迹。相思獨不見。

弄潮曲

妾身嫁與弄潮兒。妾夢依依江水湄。南風北風吹五兩。上船下船齊蕩槳。桃花高浪接烟空。杳杳歸帆夕照中。慎勿沙頭候風色。佳期不來愁殺儂。

春歌

院落深深杏花雨。鶯聲啼遍辛夷塢。流蘇羅幙尙輕寒。博山輕飄香一縷。鸞鏡曉梳春雲長。玉釵寶髻蟠鴛鴦。斜捲重簾貼翡翠。金勒雕鞍嘆何處。誰家池閣咽笙歌。月照清尊金叵羅。愁人獨夜不成寐。鮫綃曉起看紅淚。

夏歌

槐陰滿地花陰薄。玉殿銀牀閉朱閣。白苧新裁染汗香。輕風洒洒搖羅幙。瑤塔飛盡石榴花。日輾晶簾影欲斜。雕梁晝永午眠重。錦茵扣落釵頭鳳。額上鵝黃膩曉粧。鶯聲啼起江南夢。南塘女兒木蘭舟。採蓮何處歸渡頭。輕橈漫唱橫塘曲。波外夕陽山更綠。

秋歌

紗廚爽氣殘宵迥。露滴虛庭玉屏冷。池蓮粉落夜有聲。井梧葉下秋無影。金壺漏徹生西風。珠簾唧唧鳴寒蟲。金刀剪取機上素。玉關夢斷羅帷空。縫作衣裳寄遠客。蘭燈熒熒明暗壁。含啼自草別離難。驛使明朝發南陌。

冬歌

銅壺一夜聞寒枕。紗窗月冷鴛鴦錦。烏鴉驚飛轆轤長。樓前倏忽生曙光。侍婢金瓶瀉鳴玉。曉簾水澁胭脂香。春山欲眠眠不得。闌干竚立寒霜白。去年照鏡看花柳。琥珀光深傾夜酒。羅幙重重圍鳳笙。玉容今爲相思瘦。青驄一別春復春。金戈鐵馬瀚海濱。驚沙吹雪冷黑貂。香閨良夜何迢迢。

洞仙謠

紫簫聲裏彤雲散。簾外霜寒鸚鵡喚。夜闌孤燭照羅幙。時見疎星度河漢。丁東銀漏響西風。露滴梧枝語夕蟲。鮫綃帕上三更淚。明月應留點點紅。

寄女伴

結廬臨古渡。日見大江流。鏡匣鸞將老。花園蝶已秋。寒山新過雁。暮雨獨歸舟。一夕紗窗閉。那堪憶舊遊。

相逢行

相逢青樓下。繫馬門前柳。笑脫錦貂裘。試取新豐酒。

雜詩

梧桐生嶧陽。斲取爲鳴琴。一彈再三嘆。舉世無知音。
我有一端綺。今日持贈郎。不惜作君袴。莫作他人裳。
精金明月光。贈君爲雜佩。不惜棄道傍。莫結新人帶。

貧女吟

豈是無容色。工鍼復工織。少小生寒門。良媒不相識。

宮詞

披香殿裏會宮粧。新得承恩別作行。當座繡琴彈一曲。內家令賜綵羅裳。
綵羅帷幙紫羅茵。香麝霏微暗襲人。明日賞花留玉輦。地衣簾額一時新。

宮牆處處落花飛。侍女燒香對夕暉。過盡春風人不見。殿門深鎖綠生衣。
鸚鵡新詞羽未齊。金籠鎖向玉樓栖。閒回翠首依簾立。却對君王說隴西。
長信宮門待曉開。內宮金鎖鎖門回。當時曾笑他人到。豈識今朝自入來。
新擇宮人直御床。錦屏初賜合歡香。明朝阿監來相問。笑指胸前一佩囊。

楊柳枝詞

灞陵橋畔渭城西。雨鎖烟籠十里堤。繫得王孫歸思切。不同芳草綠淒淒。

竹枝詞

永安宮外是層灘。灘上行人多少難。潮信有時應自至。郎舟一去幾時還。
家住江南磧石磯。門前流水浣羅衣。朝來閒繫木蘭棹。貪看鴛鴦相伴飛。

閨情

燕掠斜陽兩兩飛。落花撩亂撲羅衣。洞房無限傷春思。艸綠江南人未歸。

秋恨

絳紗遙隔夜燈紅。夢覺羅衾一半空。霜冷玉籠鸚鵡語。滿階梧葉落西風。

古別離

李淑媛 自號玉峯主人

西隣女兒十五時。笑殺東隣苦別離。豈知今日坐此恨。青鬢一夜垂絲絲。愛郎無計繫驄馬。滿懷都是風雲期。男兒功名自有日。女子盛歲忽已馳。吞聲那敢歎離別。掩面却悔相見遲。聞郎已過康城縣。抱琴獨對江南湄。妾身恨不似江雁。翩翩羽翮遙相隨。粧臺明鏡棄不照。春風寧復舞羅衣。天涯魂夢不識路。人生何用慰愁思。

漫興贈郎

柳色江頭五馬嘶。半醒半醉下樓時。春紅欲瘦臨粧鏡。試寫纖纖却月眉。

自適

虛簷殘溜雨纖纖。枕簟輕寒晚漸添。花落後庭春睡美。呢喃燕子要開簾。

秋思

翡翠簾疎不蔽風。新涼初透碧紗櫺。涓涓玉露團團月。說盡秋情草下蟲。

倚雲樓

成氏

登臨無限意。春意獨搔頭。虛榻松鳴雨。村田麥借秋。

竹枝詞

楊柳含烟灞岸春。年年攀折贈行人。東風不解傷離別。吹却低枝掃路塵。

楊柳詞

俞汝舟妻

條妬纖腰葉妬眉。怕風愁雨盡低垂。黃金穗短人爭挽。更被東風折一枝。按轡營中占一春。藏鴉門外麴絲新。生憎灞水橋頭樹。不解迎人解送人。

宮詞

權貴妃

忽聞天外玉簫聲。花底徐聽獨自行。三十六宮秋一色。不知何處月偏明。

送行

德介氏

琵琶聲裏寄離情。怨入東風曲不成。一夜高堂香夢冷。越羅裙。上淚痕明。

春

端淑卿

院外鶯啼二月中。粧臺日影映簾櫳。潤回野草茸茸綠。暖入瓊枝簇簇紅。乍試輕羅沾社雨。偶嘗新釀醉東風。閒來點簡芳時事。花底青絲墜小蟲。

送侄女之陽和

溪水綠於苔。風帆輕一粟。相看只片時。且罷陽關曲。

採蓮

風日正晴明。荷花蔽洲渚。不見採蓮人。只聞花下語。

贈人

楊氏 金陵妓

揚子江邊送玉郎。柳絲牽挽柳條長。柳絲挽得吾郎住。再向江頭種兩行。

代父送行

陸娟

津亭楊柳碧粼粼。人醉東風酒半酣。萬點落花舟一葉。載將春色過江南。

秋夜

項蘭貞
字孟晚

夜靜砧初動。涼風雨乍收。一鉤新月上。應照故園樓。

霜降日偶成

王鳳嫻
字文如

楓林葉醉水痕收。人病黃花正暮秋。塞雁不知愁欲絕。猶將哀怨過南樓。
和風融日似春陽。殘菊茱萸鬪晚芳。盡道良辰堪把盞。愁人無奈夜初長。

走馬燈

狼烽起處陣圖旋。對壘無聲互占先。技巧不分誰勝負。却憐勳業上凌烟。

鐵馬

淒清轉幻斷腸聲。何事偏於愁際鳴。驚破夢魂和漏永。戰殘月影雜風輕。傷悲宋玉秋宵

思臥病相如夜雨情。寂寞寒窗添不寐。鏡中霜雪爲君生。

芭蕉

交加碧影護棋枰。綠罩窗紗暑自清。只怯薄衾秋夜永。蕭蕭疎雨夢還驚。

梧桐

月移疎影鎖長門。落葉驚秋幾斷魂。金井轆轤聲哽咽。六宮紅袖總啼痕。

效古秋夜長

鴛瓦降飛霜。風清丹桂香。冰絃未整腸先斷。錦字裁成漏正長。穿窗明月清如水。客戶吟蟲助愁起。隣家女伴亦收機。含淚移燈自掩扉。驚聞一葉飄梧墜。泣向瑤塔夜搗衣。

猿

雲深古洞自幽棲。巴峽三聲月轉西。旣解別離腸卽斷。何由偏向斷腸啼。

登烟雨樓

危樓百尺倚重霄。縹緲江天四望遙。樹色湖光當檻落。殢人不惜解金貂。

山居

張引元 字文姝

樹密禽語清。日高花氣薄。小窗傍幽巖。當窗掛飛瀑。

戲擬賦得白裏白

鶴步瑤塔淨。螢飛星漢斜。玉人舉素幙。和月折梨花。

閨思

懷人在遠道。臨鏡朱顏老。目斷大堤頭。羞踏堤上草。

題畫扇貽夫婿

萬玉繞孤亭。聲兼夜泉發。中有遺世人。論詩向明月。

梅妃怨

莫倚長門嘆月明。古來薄命自傾城。多才總有樓東賦。不入離宮絃管聲。

麗藻休論一斛珠。連城美價也難如。蚤知世上文章賤。悔却拋梭學著書。

燕子樓

捲簾黃菊正飛霜。夢覺空樓月滿床。落葉香殘秋色裏。愁來添得帶圍長。
懶看霞楮掃愁烟。雲冷巫峯獨泫然。舞袖朱絃任蕭瑟。祇應憔悴度芳年。
人自傷心春自回。倚闌愁覩燕歸來。玉簫吹斷秦樓曲。贏得紅顏鏡裏灰。
久疎京兆畫蛾眉。每對殘花泣剩枝。應有冰心向明月。怎知紅粉不相隨。

燕子樓

張引慶

字媚姝

風吹簾幙正飛霜。香燼薰籠冷綉床。一自王孫游碧落。湘流不似淚痕長。
洛陽三月雨如烟。添得離人思黯然。惆悵秦樓分鳳侶。清燈寒月自年年。
春到那堪燕又回。相思猶望鶴歸來。烟迷華表游魂遠。泣向東風心已灰。
幾度臨風鎖翠眉。腰圍瘦損似柔枝。甘同金谷遺芳譽。豈是鸞分不去隨。

春日寫懷

柳絲搖曳已含烟。啼鳥聲中思悄然。自是愁深無意緒。滿庭春艸爲誰妍。
窗外鶯啼試巧音。繡緯慵起恨難禁。如今無復尋芳意。羞見天桃發故林。
嬾向閒窗整玉琴。悶來惟和斷腸吟。無端隣笛吹楊柳。喚起鄉心淚滿襟。
繡戶春寒怯素羅。倚闌無緒奈愁何。生涯已逐飛花去。掩卷空悲弋雁歌。

寄遠

陳氏

暮雨沉沉不肯休。知君今夜宿誰樓。可憐楚水吳山外。旅况閨情一樣愁。

宿虹橋紀夢

景翩翩 字三昧

夢境還堪憶。虹橋的可疑。豈因填鵲至。重與牽牛期。落月穿帷淨。妻風入夜悲。無端角枕上。薄命訴蛾眉。

怨詞

豈曰道路長。君懷自阻止。妾心如車輪。日日萬餘里。
妾作溪中水。水流不離石。君心似楊花。隨風無定跡。

閨情

窗前六出花。心與寒風折。不是郎歸遲。郎處無冰雪。

風雨

風雨滯殘春。豈但梨花悶。夢裏萬重山。疊起江南恨。

閨思

迴文

簫吹靜閣曉含情。片片飛紅映日晴。寥寂淚痕雙對枕。短長歌曲幾調箏。橋垂綠柳侵眉
淡。楊繞紅雲拂袖輕。遙望四山青極目。銷魂黯處亂啼鶯。

泊濠曲

舜玉

號竹雲居士

芙蓉帶結紅鸕蒂。楊柳絲牽紫燕飛。獨棹蘭舟何處宿。年年飄泊待郎歸。

戲題

花知妾意纔含笑。柳見郎來忽作眠。幾度欲將羅帶解。只愁鸚鵡向人傳。

中山孺子妾歌

陸卿子

雲中掩素光。桃李羞紅顏。皓齒時或啓。一笑傾城歡。自爲中山孺子妾。豈道君情有萬端。團扇泣秋風。長門摧紫蘭。蛾眉恨蕭颯。玉筍流潺湲。攀車不肯出。猶憶昔時憐。

行路難

錦衾蘭麝熏。羅幙春風寒。結髮與君婚。綢繆心所歡。膠漆誰能間。金石固無殘。片言偶失意。睚眦起仇端。佳人凋秀色。明鏡別飛鸞。驅車出門去。千里浩漫漫。少小倚嬌寵。誰知行路難。回頭語新人。恩情良已殫。

妾薄命

君恩薄似霧。晻靄不盈勺。妾意皎如霜。淒淒焉所託。玉階月色微。金屋網蜘蛛。夜半笙歌

起。君王何處歸。莫買相如賦。白頭愁可移。莫聽團扇歌。炎涼坐奪時。願言一片誠。遺却千古情。
四海浮雲盡。中天素月明。

邯鄲才人出爲厮養卒婦

邯鄲多美女。秀色多婉嬋。寧知南威麗。豈顧西子妍。一朝失寵去。閨澹如孤烟。薄雲難作
雨。雜霧空迷川。楚水無遺景。巫山有夢傳。紅顏委野草。惆悵一生憐。

妾薄命

爲出媿玉環作

憶昔嬌小時。自憐玉不如。春風綽約楊柳腰。夜月嬋娟桃李姿。夜月嬋娟照桃李。朱門駘
蕩春風起。枝枝嫵媚競繁華。片片芳菲撲羅綺。流光婉轉繞芳叢。春思徘徊雜蘭芷。朝吹豔曲
彩雲間。暮奏雲和紫霞裏。綠葉成陰春已深。一夜秋風吹桂子。離披枝葉氣蕭森。樹影扶疎根
半死。翠蛾顰蹙淚痕舒。紅顏泣盡長江水。當年阿母流青盼。瑤池幾度曾相見。明珠解換玉連
環。黃金笑買芙蓉面。清謠飄斷寂無聲。玉桃花謝桑田變。怨霧遙迷碧海深。愁雲深鎖青山遍。

愁雲怨霧杳沉沉。棄妾朝來恨最深。腸斷落花無復意。淚和殘露滿衣襟。

送范夫人從宦游滇南

日暮送行人。離愁滿江潯。江雲慘不飛。相對兩無語。
相見情已深。相別愁人心。借問此何爲。爲君多好音。

花燭詞送顧氏侄干飛

日照粧樓夜不眠。學梳雲髻尙疑偏。細看鏡裏徘徊影。重拂鴉黃貼翠鈿。
畫檻雕闌綴綺疏。蘭房初試繡裙裾。重開芍藥帷前鏡。照見新粧別樣梳。
華燭含暉照洞房。簫歌聲裏識蕭郎。繁音豔節教春住。看取雙蛾畫更長。

美人春睡

雲母屏風七寶床。流蘇帳暖鬱金香。美人昨夜傷歌舞。宛轉蛾眉避曉光。

宮詞

玉樹繽紛落絳英。夜深臺殿起秋聲。君恩何似中天月。一片清光處處明。

酬范夫人

萬壑松風萬壑秋。一聲啼鳥一聲愁。愁心欲寄憑誰寄。寄與溪流帶淚流。

閒居即事

閉門聊自適。陋巷薜蘿深。柳色啼春鳥。波光澹夕陰。落花閑覆地。空靄靜依林。若問幽棲意。床頭有素琴。

贈婢

剪破楚山雲。繪作芙蓉履。有時渡湘江。片片隨秋水。

歸雲

陸卿子

一片湘江雲。飛來何浩蕩。無心作春雨。且宿青山上。

嘲老妓

蟬髻時飄雪。蛾眉半帶霜。怪人推甲子。顧影理殘粧。

病妓

斜倚銀屏罷按歌。楚腰纖弱不勝羅。小庭月落花無語。脈脈愁聽夜雨多。

別范夫人

相逢只恐話睽離。相對還疑是別時。腸斷落花飛欲盡。春風吹作隔年期。

古意

欲言不言心斷絕。欲去不去傷離別。袖刀剪却藕中絲。掩淚難看掌上玦。

贈節婦羸氏

月白孤鴻天際鳴。空庭落葉散秋聲。機中空有迴文字。不向泉臺寄別情。

山居卽事

有地皆埋玉。無山不種松。雨深朝拾菌。日煖晝分蜂。麋鹿緣巖下。狐狸采藥逢。桃花開已

遍樵客欲迷蹤。

山莊留別

短牆修竹繞空亭。畫檻朱欄夜不扃。極目烟霞秋色裏。亂山重疊半含青。

中山孺子妾歌

徐媛 字小淑

泣魚要固寵。悲扇斷恩私。霍霍春陽豔。燐燐桃李滋。劃焉素秋至。中道恆相遺。紅葩有消歇。月盈還蔽虧。莫作中山孺子妾。半寸纖蛾千縷結。別鶴離鸞怨碧空。長門夜久高明月。

贈美人

巧笑弄明璫。含嬌出洞房。裁金粘粉靨。拂鏡寫鴉黃。寶帳藏秋月。金爐裊夕香。鴛鴦籠翠帶。蘭麝染羅裳。倭墮梁家髻。梅花帝子粧。輕盈妬羅女。窈窕屬王昌。漫理將雛曲。閑調陌上桑。鳴琴坐文石。幽響發清商。

燈宵曲

春風吹雲生晚晴。空光曳練飛弓弮。官街馬蹄踏踏行。玉壺漏箭鳴丁丁。華燈九枝排龍
檠。吳兒傀儡鬧雕棚。月綴金鋪素影呈。沉香火底鳳簫橫。倡樓怨婦思不禁。花裙步蹙蘭苕萌。
雙環垂耳夜珠明。牽鸞拖珮鬪腰輕。挾箏抱琴發清聲。高山停雲飛鳥平。神魚躍浪波臣驚。歌
成一曲酒數觥。倒瀉銀河水一泓。

題山水圖

花塢長堤跨石橋。畫船春水曲江橈。月明靜夜重陰碧。樹抄啼鶯亂玉簫。

戲贈表妹合歡詩

桂室蘭燈燦。雲窗鼓吹新。人如臨月戶。色擬漢宮春。整豔窺鸞鏡。修粧理翠巾。含嬌愁出
幙。掩映背腰身。

畫羅飄幌額。毳帳鬱金床。屏葉雕雲母。樓心掛月璫。避風臺影翠。蓮步襪生芳。有婿恆爲
伴。攜來花下觴。

牛女

鵲梁斷銀漢。別恨黯清流。霧帶朝來減。風鬢午夜愁。斂妝消舊粉。整匣抱新綢。脈脈憑機杼。雙心似去秋。

宮怨

金屋風吹粉黛香。夜寒高碧見河梁。雙星不向人間照。冷盡梨花白玉床。

代閔娘閨思

翡翠花鈿碧玉冠。薄羅衫子護春寒。閒來紫陌樓頭望。數盡飛花人未還。雙星黯黯限河梁。風靜簾虛月一床。夢去枕屏空掩翠。愁來無那漏聲長。

採蓮曲

妖冶三三隱綠楊。紫騮飛控紫絲韁。應知隔面情如語。暗送風開寶袜香。十二峯頭秋露涼。門前沙白水蒼蒼。浣紗溪上新萍色。不似蓮花並妾妝。

雨中花

潤雨頻含笑。迎人乍倚風。漫看枝上色。點點綠叢中。

清夜聞鐘

張嫺婧 字蓼仙

疎鐘在何處。點點落山房。一榻寒浸夜。禪心映月光。

送試

一劍向南洲。光氣噴牛斗。平生千古心。不勸別離酒。

咏懷

披吟聊自娛。不欲使人知。自古好名者。多爲名所癡。

夜景

冷葉蘸秋光。幽艸滄夜洌。月明叫草蟲。孤燈半明滅。

秋風

敲竹清音遠。摧梧爽籟輕。小窗紙破久。颯颯有秋聲。

秋月

玉扇揮江白。銀鈎掛碧天。關山吹笛者。今夜幾人眠。

病起

病起春將去。落英滿綠苔。閒步空堦上。問花可再開。

夜聽

秋風吹亂蒹葭艸。寒雨半天松葉老。孤燈明滅不成花。數盡疎鐘猶未曉。

讀李易安漱玉集

從來才女果誰儔。錯玉編珠萬斛舟。自言人比黃花瘦。可以黃花奈晚秋。

染甲

玉笋蘸丹沙。織織吐豔葩。杯擎鸚鵡啄。袖蹙牡丹芽。勻粉飄紅雪。梳雲落絳霞。瑤琴理一

曲片片撒桃花。

擬古

小青

雪意閣雲雲不流。舊雲正壓新雲頭。米顛顛筆落窗外。松嵐秀處當我樓。垂簾只愁好景少。捲簾又怕風繚繞。簾捲簾垂底事難。不情不緒誰能曉。爐烟漸瘦剪聲小。又是孤鴻淚悄悄。

禮觀音

稽首慈雲大士前。莫生西土莫生天。願爲一滴楊枝水。灑作人間並蒂蓮。

感懷

春衫血淚點輕紗。吹入林逋處士家。嶺上梅花三百樹。一時應變杜鵑花。

絮影

新粧竟與畫圖爭。知在昭陽第幾名。瘦影自臨春水照。卿須憐我我憐卿。

弔蘇小

西陵芳草騎鱗鱗。內信傳來喚踏青。杯酒自澆蘇小墓。可知妾是意中人。
讀還魂記

冷雨幽窗不可聽。挑燈閑看牡丹亭。人間亦有癡于我。豈獨傷心是小青。
懷母

鄉心不畏兩峯高。昨夜慈親入夢遙。說是浙江潮有信。浙潮爭似廣陵潮。

雜詠

何處雙禽集畫闌。朱朱翠翠以青鸞。如今幾箇憐文彩。是向秋風鬪羽翰。
脈脈溶溶豔豔波。芙蓉睡醒欲如何。妾映鏡中花映水。不知秋思落誰多。
盈盈金谷女班頭。一曲驪珠衆妓收。直得樓前身一死。季倫原是解風流。

寄夫人

百結迴腸寫淚痕。重來惟有舊朱門。夕陽一片桃花影。知是亭亭倩女魂。

看劍

朱瀾
字碧波

簇簇芙蓉鏢。寒光不可親。柔心持自遣。俠氣對逾真。照面春山蹙。迴眸秋水新。時時勤拂拭。欲擬薄情人。

送夫

孔氏

君行萬里舟。妾送登南樓。相望不相見。江水空悠悠。

古意

趙燕
字彩姬

河邊楊柳樹。枝葉何裊裊。一朝花落飛。東西不相保。人生會晤難。別雖何太早。昔爲連理枝。今爲斷腸草。睠念當時歡。相思令人老。

送別

寂寐春江上。孤舟去莫留。思君若流水。日夕伴行舟。

寄陳八玉英時留姑蘇

何處簫聲獨上樓。傷心桃葉水空流。一從南國春銷後。誰復佳人字莫愁。

暮春江上送別

一片潮聲下石頭。江亭送客使人愁。可憐垂柳絲千尺。不爲春江縮去舟。

送張幼于還吳門

花前雙淚濕衣裾。把酒江亭落日餘。此去吳江霜月滿。逢人好寄洞庭書。

送沈嘉則游廣陵

秋風吹送木蘭舟。處處青山待隱侯。莫向尊前歌玉樹。揚州花月使人愁。

贈夫

劉文光妾

玉手纖纖捧玉杯。仙郎南去幾時回。天涯到處生芳草。須記凌寒雪裏梅。

詠懷

周文
字綺生

幾點愁人淚。不許秋風吹。吹到長江裏。江流無盡期。

花燭詩爲董月生作

朱泰玉 字無暇

芳樹成連理。名花本並頭。將雛歌鳳侶。對鏡舞鸞儔。未貯金爲屋。先看玉作仇。雙星天上麗。夜夜映簾鈎。

帆影

張回 字淵如

勞勞亭次別。無計共君歸。一葉隨風去。孤帆挾浪飛。目窮河鳥亂。望斷浦雲非。只在天涯畔。傷心隔翠微。

雜詠

梁玉姬 號瑯嬛女史

松響翻清籟。泉聲浣俗塵。白雲堪贈客。明月解留人。

賦得落花

佳人笑立宋家東。一夕驚離五杵宮。紅粉飄零緣薄命。不須惆悵妬花風。

無題

的的殷紅拭未乾。兒郎偷剔燭花看。年來無數梨花夢。一夜春風破悄寒。

秋懷

楊宛
字宛叔

獨自支頤獨自愁。深情欲語又還羞。從來薄命應如此。敢比鴛鴦白到頭。

贈別

齊景雲

一呷春醪萬里情。斷腸芳草斷腸鶯。願將雙淚啼爲雨。明日留君不出城。

落花

方氏

綠窗人靜落殘紅。飛盡郊園錦幾重。黃鳥解人憐惜意。却將婉語罵東風。

題畫扇答訊

林奴兒

昔日章臺舞細腰。任君攀折嫩枝條。如今寫入丹青裏。不許東風再動搖。

凭欄

王玄
字玄卿

雨迴桃葉渡。秋水碧差差。倚檻臨流處。凝眸不語時。雲與意俱遠。月於陰漸移。懶歸妝閣

去偏此觸相思。

秋夜送別

王微
字修微

握手應無語。離亭日漸過。霜寒天不曙。月好夢無多。英言君去急。妾思逐流波。

中秋賦戲宛叔

霜滿枝。月滿枝。彷彿孤衾薄。徘徊就枕遲。年年今夜翻成恨。落盡芙蓉知不知。

懷蘇郎

雁來孤獨夜。閒坐憶蘇郎。夢見如何夕。天寒道正長。

秋夜梁溪道中別御君

此夕風兼雨。孤篷愁正生。那堪君又別。剩我守殘更。

獨汎

二月西湖上。春風無盡頭。祇應獨來往。不許動春愁。

探梅

故人辭我去。期我梅花時。昨夜偶相念。起看庭樹枝。

怨梅

庭樹亦如昨。故人來何時。花花自早發。偏爾獨開遲。

代梅答

寄語問樹人。歲月那能借。爾意怨開遲。儂意憐遲謝。

山齋同友坐月

月上桐陰薄。閒堦夜氣清。與君到曉坐。幽思自然生。

寄別

乍聞馬首西。潛然無一語。未及與君別。魂迷雲際樹。

送生甫

爾別何所游。月明江上舟。異日思君處。憑欄看水流。

冬夜

獨坐渾無語。含顰應有思。私心自不寐。何事倩君知。

次友夏韻

臨水聞君別。月寒如此心。淚盡碧溪漲。那知淺與深。

夜月

寒湖浮夜月。清淺幾迴波。莫道無情水。情人當奈何。

秋夜

凄切秋聲蟲絡絲。入簾殘月似蛾眉。愁心不逐閒雲散。長比寒溝月照時。
何處鳴蛩不可憐。霜閨搖落夜無眠。題殘紈扇光疑月。多少人間不共圓。

月斷空閨花影移。含情偶草十離詩。一生會晤因緣薄。夢裏逢君夢已疑。

秋日閒賦

露寒殘月上蒹葭。近日離魂未有涯。寂寞經年人不見。空房夜夜數歸鴉。

昌化道中作

照返烟溪樹影斜。千山含翠暮雲遮。年來已自多愁緒。古道無人更落花。

春日有懷

昨夜相思夢欲成。含情幾被落花驚。月明此際知何處。遙憶江邊山上晴。

賦戲閨人

憶郎此日不曾癡。倚閣憑欄應自知。挑盡殘膏無一語。背人偷看合歡詩。

戲代

憶昔花前目應時。今來如夢復如思。縱然他日能相見。結得同心應已遲。

寄吳郎

王賽玉

舊事巫山一夢中。佳期回首竟成空。郎心亦是浮萍草。莫怪楊花易逐風。

陌上桑二首

方孟式

字如耀

鬱鬱陌上桑。拂拂秋風度。故人暫時新。新人容易故。

鬱鬱陌上桑。滔滔江漢水。來去牽離情。浩歌北山杞。

長相思

嚶嚶草下蟲。鬱鬱南山蕨。瀟瀟風雨夜。膠膠鷄鳴月。未得見君子。殘粧束故髮。薄命不如人。何年病不發。

待月

遲月淡籠煙。期人較可憐。荷風疎雨後。螢火亂星前。烏鵲殘生影。梧桐隱半絃。因之默坐久。花上月娟娟。

病中思歸

嵐氣爐煙合。疎燈影素移。愁生零雨夜。病值落花時。夢裏鄉音近。天邊雁字遲。床頭閒月色。心事薄光知。

寄錢夫人

一別三春渺。徘徊起客愁。皖江明月夢。襄水白雲秋。蘭葉香侵室。瓊花錦作舟。孤鴻何不至。烏鵲亂枝頭。

懷孀妹

憶昔春深日。鳴機更論文。庭前誇咏絮。閨裏自凌雲。卮酒寒花老。離絃落葉紛。誰憐孤影在。殘雨不堪聞。

聞雁

客舍蕭條窗雨清。空塔落木遠人情。玉關霜信秋江冷。孤榻寒聲曉夢驚。拜月調砧憐影

度迎風織字訝紋生。流光荏苒無窮恨。厭聽嘹嘹到五更。

和夫黃鶴樓作

晴川遠樹白雲浮。聞道遨遊黃鶴樓。鸚鵡洲前分二水。漢陽城外泊孤舟。萋萋草色春闈怨。活活江聲夜客愁。捲幔躊躇看不見。空憐新月曲如鉤。

美人思春

玉釵敲冷兩鴛鴦。似醉慊慊困海棠。夢裏白頭將化石。愁來青鬢易生霜。笛中風細驚楊柳。絃下雲低泣鳳凰。咫尺天涯虛錦字。門前春與月華長。

江上聽潮

乘春畫舫一溪雲。獨宿江洲待月明。陡覺潮生驚夜雨。南天寒葉盡飛聲。

江頭夜雨

細雨還風夜。船頭鼓角長。猿聲啼不住。琴瑟自淒涼。

吳令儀

字棟倩

夜

新月不來燈自照。江天獨夜夢頻驚。長年自是無歸事。未必風波不可行。

琴倦

獨坐舟中彈玉琴。絃中山水自清音。遣愁假寐驅閒思。夢入愁城愁更深。

七夕

吳令則

秋宵淡烟渚。鶴駕俟天河。橋成謝烏鵲。歡極袁情多。稚女能乞巧。莫索雲間歌。惟憐弦後夜。孤影弄金梭。

宿姚姊清芬閣

連榻曾無寐。長天不肯明。入簾疎月影。高枕遠風清。香氣靜生室。禪堂空拂雲。相依能白首。古學自然成。

迴文四首

薛氏

花朵幾枝柔傍砌。柳絲千縷細搖風。霞明半嶺西斜日。月下孤村一樹松。
涼回翠鈿冰人冷。齒沁清風夏井寒。香篆裊風青縷縷。紙窗明月白團團。
蘆雪覆汀秋水白。柳風凋樹晚山蒼。孤燈客夢驚空館。獨雁征書寄遠鄉。
天凍雨寒朝閉戶。雪飛風冷夜關城。殷紅炭火圍爐暖。淺碧茶甌注清茗。

中秋

寂寂中秋夜。含情出玉閨。河長看雁遠。月皎覺雲低。

戲示女伴

誰道孤眠苦。孤眠卻自強。請看隔宿髻。常是不勞粧。

曉景

春日映朝霞。新粧出絳紗。開簾驚宿鳥。倚樹落危花。

睡起

下幃恣午睡。怪殺鳥相呼。起來慵刺繡。窗下理葛蒲。

製履寄外

何物寄殷勤。宮鞋綠錦文。爲郎承素足。指日踏青雲。

冬至

冬至宵雖短。孤眠恨自長。枕單寒入夢。窗破月窺床。

月夜

沈宜修 字宛君

冰鏡懸天出。松濤雜桂風。素光篩亂影。清靄映芳叢。小簾涼生翠。疎簾夕隱紅。不知明月下。幾處怨香籠。

並蒂蘭

佳瑞浮香靄。天風惠好音。紫莖開並蒂。綠葉結同心。猗猗清芬遠。青青幽韻深。古來稱獨秀。猶羨楚騷吟。

暮春十五夜月

三五嬋娟散彩紋。空庭花落正紛紛。望中新綠侵光冷。檻外浮青入影分。遙憶故園還照屋。黯思此事獨看雲。夜深莫向欄前倚。此際鶉聲不可聞。

七夕

寥廓微雲送夕陽。相傳此夜會牛郎。蟾光初照河中景。鵲駕新催水上妝。既到歡娛猶恨否。乍教離別亦情忙。人間豈少經年隔。莫怨星槎是渺茫。

懷張倩倩

叢桂風吹薜荔茵。秋深蘭佩不堪紉。荒涼舊事隨溝葉。荏苒寒光鎖澗蘋。芳草年年徒自老。愁心歲歲總如新。兼葭一望蒼波遠。鴛錦何由贈故人。

別後西樓把袂難。相思江上月光寒。共憐每隔星霜換。兩處頻驚歲月殘。芳草湖山應寂寞。暮雲樽酒已闌珊。故園春色還如許。攜手同君夢裏看。

夜深月下聞歌

空階步月夜何其。歌管聲聞花外吹。露下亂蛩喧砌早。雲中新雁寄書遲。何堪涼夜徒憐我。試問清光爲照誰。自古悲秋萬里客。芙蓉嬌怨對澄漪。

元日

柏葉杯中泛。門宜金字新。輕黃將上柳。欲惱翠樓人。

楊花

散漫天涯去。風前亂若斜。傷心無限恨。欲寄此飛花。

對鏡

徘徊羞對爾。瘦盡獨君憐。憔悴還相共。愁看明月前。

題屏上美人

荇渚晴波渺。春條憶遠人。東風吹競綠。萬縷爲誰春。

紫燕啣春色。羅裙草拂煙。依依昨夜夢。佇立杏花邊。
無語芭蕉下。輕羅不耐秋。低鬟倚玉腕。團扇若知愁。
梅吐庭前玉。輕搖碧袖低。一枝春在手。翹首隴雲迷。

愁

粧前常對鏡。清夜與君同。賴得深相契。消磨歲月中。

秋日

蕭瑟庭前樹。蛩聲永夜哀。愁心已無限。何必又秋來。

秋閨
迴文

秋暮愁行客。日斜飛柳烟。流雲歸遠岫。薄霧淡高天。
花庭啼鳥亂。疊恨鎖山眉。霞落映寒渚。蝶飛驚墜枝。
鈎簾映皎月。永夜簡奇篇。幽徑竹花露。石寒縈碧錢。

疎雨滴高樹。細風飄暮烟。初聞獨雁過。木落自年年。

梧桐怨

月高春影薄。遷候不知秋。總有臨風句。難憑葉上浮。

感舊

平橋綠野麥花新。草色含烟遶路陳。人事黯然隨逝水。淚彈餘恨滴江蘋。
茫茫古道共斜暉。啼亂鶯聲柳葉肥。空有新辭悲舊事。晚雲收拾滿船歸。

月

長河空碧縷雲浮。萬里寒光玉樹秋。但願長如粧匣鏡。教休還作畫簾鉤。
一片砧聲怨隴頭。班姬愁絕玉階幽。茫茫竊藥當年事。惹得清光庾亮樓。

題美人圖

薄薄羅衫宮樣新。梨花裙映碧苔茵。顰眉盡日思何事。宛轉秋波不留人。

含嬌不語倩誰憐。白雪無心綠綺絃。侍兒那解愁如許。日傍桐陰炷碧烟。

七夕

蕙草含烟桂影浮。穿鍼樓上綺羅秋。桐陰寂寂飛螢度。銀漢遙憐會女牛。
雲母屏風映水晶。琅玕碧樹晚涼生。相逢莫話經年事。只恐重傷離別情。
微雲斜月澹河梁。白露無聲濕芰裳。鵲駕乍歸雞又早。玉壺偏惜一宵長。
疎雲橫漢月微明。鸞馭亭亭鵲駕成。露冷瑤階秋寂寂。寶簾螢影夜光平。
粧樓斜月畫新眉。香霧瓏璵玉鎖幃。佳會何須重怨別。不知何處最堪悲。

七夕贈六妹合歡

雲移曉日映新粧。柳葉迎風拂鏡長。莫問姮娥清夜永。雙星此夕駕河梁。
繡踏蓮花步處生。行雲微曳越羅輕。今宵試看如鉤月。不似簾前隔歲情。
風吹玉露滴支機。銀漢波澄碧影輝。花氣籠烟分麝月。畫屏秋色隱羅幃。

香含玉樹送新涼。彩扇遙遮逗月光。笑指女牛經歲別。相看莫羨有情郎。

贈文然姪新婚

鵲使銀河乍駕橋。巫山十二彩雲邀。漢宮一樹桃花雨。青雀啣春下碧霄。
淚染紅香濕絳綃。瑠輿簇遶珮聲遙。最憐今夜笙歌處。愁黛含嬌整翠翹。
扇隱亭亭玉步搖。兩行銀燭醉紅綃。合歡枝上花開後。一夜東風到柳條。
拂鏡春山學淡描。羞郎猶自怯郎嬌。從今莫歎標梅晚。吹徹秦樓紫玉簫。

秋日村居

葉紈紈 字昭齊

風月逢秋美。村聲入夜幽。鳥驚棲復散。螢冷度還休。幾處江帆落。三更畫角愁。良宵清不寐。秉燭上西樓。

細風吹遠樹。秋色滿松關。午睡方消枕。斜陽又過山。但憑書帙隱。自識綺羅閒。回首碧雲杳。虛庭夜月閒。

立春

臘向愁中盡。春從夢裏來。忽驚雙紫燕。獨上美人釵。

無題

曲沼紅香歇。平欄綠水清。無邊秋色在。俱是夢中情。

蝴蝶亂飛飛。梧桐日日殘。羅衣不耐冷。明月好誰看。

梨花

燕語鶯啼寒食天。紅粧不學露桃鮮。清含瑤蕊飄香雨。淺放瓊絲拂素烟。曉月葳蕤侵冷
豔。夕陽縹渺弄輕妍。芳魂若應能憐我。寂對東風共愴然。

閨情

薄羅初試柳初黃。寂寂深閨春晝長。陌頭風暖清明近。睡起無言倚繡床。

七夕

玉樓瓊院暮霞明。迢遞河橋鵲駕成。只恐嫦娥容易去。殘機重理恨難平。拂鏡開奩畫翠眉。粧成人出紫雲幃。一宵相晤經年別。最是歡時獨更悲。

悼婢繡搖

數載依依共曉昏。薰衣籠畔最溫存。可憐風雨催零落。惆悵屏前空斷魂。

梅花

風飄竹外玉珊珊。冰骨稜稜不耐寒。贏得騷人無限意。夜深獨自倚欄干。幽姿不引蝶窺忙。簾外愁看芳艸長。薄倖東風初作惡。玉英吹落斷人腸。羅浮夢裏最風流。月落參橫萬種愁。別後香魂應化蝶。年年飛向嶺頭遊。玉貌檀心不許猜。夜寒長共月徘徊。角聲嗚咽霜天曉。縹渺香魂到鏡臺。

曉起

葉小鸞 字瓊章

曙光催薄夢。淡烟入高樓。遠山望如霧。茫茫接芳洲。清露滴碧草。色與綠水流。窺粧簾幃

捲清香逼衣浮。聽鶯啼柳怨。看蝶舞花愁。茲日春方曉。春風正未休。

秋日村居

冰簟波長靜。湘鉤捲更悠。繡餘芳草暖。書罷夕陽休。團扇慵題怨。雙蛾豈解愁。遙思秦弄玉。千載一簫樓。

秋氣悲搖落。清心淡不關。竹梢梳白日。水面洗青山。臨鏡花常曉。薰香韻自閒。幽懷何所寄。遠在碧霄間。

春日曉粧

攬鏡曉風清。雙蛾豈畫成。簪花初欲罷。柳外正鶯聲。

楊花

春來却疑雪。點點送春歸。豈若瑤臺下。瓊葩伴月飛。

題繡扇

芙蓉照水開。翠鳥依枝立。蝴蝶若憐風。盈盈香氣襲。

遊西湖

堤邊飛絮起。一望暮山青。畫楫笙歌去。悠然水色冷。

雲期兄以畫扇索題賦此

春來處處盡芳菲。寂寂山花映水飛。水色似明春月鏡。花光欲上美人衣。子規啼老無人處。蝴蝶滿山紛落絮。邈然青天不可攀。惟見江水流潺湲。江外雲山幾曲重。丹崖翠岫交蒙茸。霏微烟際桃花雨。氤氳香前薜荔風。松聲一響度萬壑。下有幽人桂艇泊。扣舷長嘯數峯青。臥看吹花巖下落。沉沉谿畔石屏開。裊裊遊絲綴綠苔。碧蘿倒掛亘千尺。深山寂靜真幽哉。白雲千古悠悠在。獨坐對此心徘徊。前溪流出胭脂水。疑是漁郎渡口來。

早春紅千折梅花至偶成

遲遲簾影映清霄。日照池塘凍若消。公主梅花先傅額。美人楊柳未垂腰。紗窗繡冷留餘

線綺閣香濃。遠畫綃。試問侍兒芳草色。階前曾長碧雲條。

秋暮野望有感

遠浦歸帆帶夕陽。一聲漁笛過橫塘。疎楊影瘦蟬聲咽。禾黍風低鳥渡忙。北望雲山如恨疊。東流日夜似愁長。蕭條此際柴門寂。極目平蕪總斷腸。

詠屏上美人

曉粧初罷出房櫺。閒看庭花樹樹紅。立久暗多惆悵事。好將春意付東風。
繡鞋徐步踏青時。流水橋西弄柳絲。猶見梅梢鎖殘雪。杏花幾日放胭脂。
庭雪初消月半鉤。輕漪月色共相流。玉人斜倚寒無那。兩點春山日日愁。
曲欄干前滴芭蕉。淺恨深情束細腰。香烟一縷愁千縷。好付春心帶雨飄。
閒尋女伴按秦箏。休向花前訴有情。共笑嫦娥偏習靜。夜深人寂倍清明。
昨夜纖纖雨過時。強扶春病看花枝。無聊獨倚湖山畔。蝴蝶雙飛那得知。

又題美人遺照

繡帶飄風裊暮寒。鎖春羅袖意闌珊。似憐並蒂花枝好。纖手輕拈仔細看。
凌波不動怯春寒。覷久還知佩欲珊。只恐飛歸廣寒去。却愁不得細相看。
花落花開怨去年。幽情一點逗嬌烟。雲鬢縮作傷春樣。愁黛應憐玉鏡前。
紅深翠淺最芳年。閒倚晴空破綺烟。何似美人腸斷處。海棠和雨晚風前。

雨夜聞簫

紗窗徙倚倍無聊。香燼金爐懶更燒。一縷簫聲何處弄。隔簾微雨濕芭蕉。

七夕

攬拂清輝映雪明。含情自理晚粧成。雙蛾久蹙春山怨。今夕相看兩恨平。
碧天雲散月如眉。漢殿新張翠錦幃。只恐夜深還未睡。雙雙應話隔年悲。
七夕後夜坐紅千促睡漫成

池畔芙蓉映碧蘿。雙星今又隔銀河。侍兒未解悲秋意。明月高懸怯素羅。

別薰綢姊

歲月驚從愁裏過。夢魂不向別中分。當時最是無情物。疎柳斜陽若送君。
枝頭餘葉墜聲乾。天外淒淒雁字寒。感別却憐雙鬢影。竹窗風雨一燈看。
絲絲楊柳拂烟輕。總爲愁人送別情。惟有流波似離恨。共將明月伴君行。

梅花

窗前幾樹玉玲瓏。半帶寒烟夕照中。啼鳥枝頭翻落絮。惜花人在畫樓東。
却憶含章點額時。鏡臺初展拂粧遲。近來贏得愁如許。雁過遙天雪滿枝。
瘦影橫窗亂月明。夢回紙帳暗香縈。無端一夜高樓月。吹碎瓊瑤滿竹亭。
初移日影上欄杆。消釋東風昨夜寒。玉暈香痕看未足。好教瓊樹莫吹殘。
霏霏昨夜雪添粧。不辨花光只辨香。獨倚小樓人不見。南枝爭似北枝芳。

傲骨欺霜映碧浮。數竿修竹伴清幽。年年燕子無消息。春信誰將寄隴頭。
蓮花瓣

一瓣紅粧逐水流。不知香豔向誰收。雖然零落隨風去。疑似凌波洛浦遊。

秋海棠

嬌姿婀娜弄芳柔。脈脈含情繞砌幽。無奈西風最蕭瑟。斷腸還恐不禁秋。

秋芍藥

一枝妖豔倚闌干。不向春前鬪牡丹。羞學贈人慵去採。秋風獨伴菊花寒。

風

張倩倩

蕭蕭竹徑鳴。捲幔如有情。木落寒山裏。千林共一聲。

憶舊

故人別後杳沉沉。獨上高樓水國陰。鴻雁不傳書底恨。天涯流落到如今。

春日

春衫帶綰縷金綃。晝永空閒碧玉簫。情到寄將何處好。曲欄杆外折紅蕉。

過橋作

行春橋上月如鈎。行春橋下月欲流。月光到處還相似。應照銀屏夢裏愁。

春日幽居

紹映淮

細竹深陰覆碧紗。石牀書帙晝拋斜。半簾細潤侵寒雨。一衲孤馨染落花。流水穿林尋野鶴。夕陽歸樹護棲鴉。春山淡漠無人共。遙倩詩囊貯亂霞。

偶成

倪瑞
字文嘉

無限春來景。偏撩餘恨人。却憎花得意。獨喜月堪親。

春盡

枝頭綠暗已殘春。亂落紅英點翠茵。此際相思無限恨。惟餘雙燕語人親。

夕陽

牆西花影覺潛移。落照微微去不知。又是一朝閒度却。可堪孤坐晚妝時。

忘憂草

吳 綉 字片霞

黃栢抽嫩幹。淺綠發新芽。離恨方多緒。空看一樹花。

秋海棠

花發珊瑚蒂。微紅著粉腮。夜深嬌不睡。須待月光來。

綠牡丹

肯辭嬌豔避真妃。淡白凝脂點翠微。爲荐天香浮閬苑。君恩新賜綠羅衣。

桂花團扇

却月裁紈素。迎風點粟黃。昨宵廣寒殿。乍發一枝香。

梅花幃

珠離玉綴幾枝迴。正是天明半欲開。一道月光寒不動。透簾應有蝶飛來。

呼婢

浦映淥 字湘青

銀瓶斜插海棠花。春色朦朧護絳紗。烟裊獸爐香欲燼。隔簾鸚鵡喚琵琶。

護鵲

片片花飛點繡帷。強拈裙帶試腰圍。欺人最是簷前鵲。說道當歸又不歸。

玉蘭

青姿孤對小樓東。習習香生度遠空。瘦質不堪風影亂。淚粧狼籍月明中。

獨立

周姍姍 字小玉

忽有悲秋意。空階獨立難。愛看雲所歷。遙憶露將溥。人意三更怯。花情五夜安。寒鴉棲不

定。纖月過林端。

有所思

一見原無意。何知有別離。傳聞雖草草。想像亦提提。夜月悲鴻跡。西風憶馬嘶。菱花長不理。相對恐相啼。

題紅

何處相思字。吳江一葉楓。東流知不悞。莫使逐西風。

樓居

余珍玉 字席人

窗前曲澗泛觴流。幾葉荷花幾度舟。漁父夜歌明月照。牧童晚唱夕陽收。人情宛似山中鳥。心事渾如水面鷗。載酒清風隨客掃。白雲同我共登樓。

話別

窗前疎雨淡烟清。吟罷多憎惜別聲。山靜樵歌日半午。水寒漁唱月三更。雲邊埜店花同宿。天外孤身鳥伴行。君去長亭回首望。一江秋色晚霞橫。

七夕

余尊玉 字其人

愁心淚滴滿滄浪。鵲報佳期故故粧。此夕乍逢相樂少。經年未會獨憂長。銀河寂靜張新幄。玉露凋殘舊觴。靈匹成梁遙一水。豈堪星帳淚千行。

雁字 迴文

風敲竹影鳥穿籬。寂寂秋聲草色姿。叢菊茂開偏映水。艷花嬌吐自臨池。東樓舞葉觀琴弄。北塞飛鴻對笛吹。空寄遠書傳雁去。融光淡川落浮扃。

暮春山居

山中寂靜白雲開。月映窗前入酒杯。埜色橋邊連艸碧。三春方去燕飛來。

題睡鸚鵡圖

一洲芳艸正萋萋。欲報家書意又迷。最愛碧梧深處好。也應相共鳳凰栖。

蝶影

玉板飛來互照清。隔溪羽翼惹魚驚。水中兩翅臨風舞。花下雙身對月明。半掛枝頭添有

色全隨夢裏本無聲。幾迴欲撲過牆去。粉落深宮似葉輕。

春夕

王曇影
字文娟

花落春無色。簷前柳絮飛。何來一歸雁。夜半到柴扉。

閒居即事

雨後碧苔長。春歸綠蔭濃。楞嚴閒讀罷。殘日下窗櫳。

有感

梅雨正連綿。悲雲濕遠天。桐花開復落。別語竟茫然。

楊柳嫋風清。飛飛燕語輕。愁含雙黛蹙。花落雨無聲。

簷前滴瀝雨。窗前明滅燈。幽懷獨耿耿。良夜竟何憑。

夏夜

密葉藏鶯小。新荷覆水圓。微雲閒縹緲。愁思不相傳。

雨向堦前滴。愁從靜夜多。聊傾殘茗飲。無可奈愁何。
最是冬缸永。今宵勝似冬。江淹雖有恨。畢竟淺于儂。

秋思

井桐黃葉墜。秋思入重樓。無限樓中意。悲秋不爲秋。
望斷月華明。久立空延佇。欲訴臨風愁。沉吟竟無語。
曉起秋無賴。蕭森竹塢幽。薇花猶吐豔。渾是不知愁。
簾外井梧飄。簾內迴腸繞。一葉一聲愁。葉盡愁難掃。

翠樓一集諸名媛族里 (前集已見者茲不更述)

沈瓊蓮

字瑩中。烏程人。父子皆仕於朝。沈以是得通籍。掖廷試守宮論當旨。孝廟擢居第一。給事禁中。爲女學士。吳興所稱女閣老是也。其所作宮體諸詩。時人以爲婕妤好花蕊。不足多讓。

楊文儷

仁和人。工部員外郎應澥之女。餘姚孫文恪公陞之繼室也。文恪公四子皆至九卿。而夫人所出者二。諸孫貴顯。近代大家。無以尙焉。

錢氏女

揚州人。見高播明詩粹選。蓋正統間人也。

馬閒卿

字芷居。金陵人。陳翰林魯南繼室也。年近八旬。不廢吟詠。書法得蘇長公筆意。善畫山水。詩名芷居集。

方維儀

孟式之妹。十七適姚。十八守節。與娣婦吳令儀以文史代織紉。評定古今宮閨詩史。主於刊落淫哇。區明風烈。君子嘉其志焉。所著有清芬閣集七卷。

周玉簫

閩中女子。武人方輿之妾。輿建議不治。繫獄七年。遣周改適。玉簫誓死不去。輿事解。感憤時事。詣闕上書。遇國變。又數年不得歸。玉簫感慕病歿。有詩一百三十篇。授其女蕙。刻而傳之。

鄭允端

字正淑。

張紅橋

閩縣人。居紅橋之西。因自號焉。恃才擇配。林鴻詩當其意。遂往來酬和。爲林外室。後林有秦淮之遊。紅橋感念成疾而卒。

田媚媚

都尉田忠義之女。木生元經室也。踪跡奇異。虞山楊儀爲傳其事。

斗娘

吳人。沈津潤卿吏隱錄云。松江女子斗娘。賦詩送其夫姚生云云。聞者愛其語意清雅。但嫌其四章語不嘉祥。未幾姚果卒於外。

董氏

西陵人。小字少玉。麻城周弘禴繼室。

呼文如

江夏營妓也。知詩詞。善琴。能寫蘭。與其姊舉齊名。後歸進士丘齊雲。兩相酬倡。名遙集編。

周絜

字玉如。家江東城南胭脂巷中。年十四。歸府判張鳴鳳。張罷官。攜歸臨桂。後詒書省父。寄詩一冊。名雲巢詩。金陵人競傳寫之。

馬氏

虎關將家婦也。作秋閨夢戍詩七言長句一百首。莆田宋珏比玉客越。得之荒邨老屋中。爲之驚歎。錄而傳之。題曰香魂集。

屠瑤瑟

字湘靈。鄞縣屠長卿之女。士人黃振古妻。

沈天孫

字七襄。寧國沈君典第三女。長卿子金樞妻。

全少光

字如玉。閩布衣莊學思之妻。

袁九淑

字君慤。通州人。錢王孫良胤之妻。四川左布政袁隨之女也。少讀經史。尤深內典。所著有
伽音集。東海屠隆爲序。

鄧氏

閩縣竹嶼人。嫁瓊河鄒氏。夫不類。女鬱鬱不自得。居二年。竟以怨死。有句云。啼鳥落花春
已暮。孤燈殘漏夜偏長。又垂簾阻歸燕。開戶入飛花。皆可詠也。

劉苑華

香山人。戶部郎何藻之妻。有詩一卷。題曰落霞山下女子劉苑華吟。

沈紉蘭

黃雙蕙

黃淑德

字閒情。嘉興人。參政黃承昊妻。學士洪憲媳也。其詩有效顰集。仲女雙蕙。字柔嘉。髫年禪

悅絕意家室。嘗誦經。聞鳥聲。有詩云。迦陵可解西來意。又報人間夢不長。年十六卒。參政從妹淑德。字柔卿。猶子茂仲。婦項蘭貞。字孟晚。皆有集傳世。彤管之盛。萃於一門。如桐城之方。吳江之葉。華亭之張。皆近代所希有也。

武氏

太僕文公翔鳳太青之妻。

鄧太妙

太青繼室。金陵九思。膾炙人口。

劉雲瓊

山西臨縣舉人趙褱之妻。有水雲居詩。自署曰離石檻花居士。

梅生

麻城士人周世遴之妻。世遴方應省試。得詩。不入鎖院而歸。

田玉燕

字雙飛。錢塘人。田子藝女。

虞淨芳

錢塘人。虞德園女。

周慧貞

字挹芬。吳江人。樵李黃公子之妻。善畫工詩。沈宛君爲之序。

董氏婦

南潯人。嫁始逾歲。抑鬱而死。

翁孺安

字靜和。常熟翁太常女。

袁彤芳

字履貞。蘇州人。憲使袁德門女。自稱廣寒仙客。才色俱絕世。

黃鴻

字鴻耀。仁和人。大參黃又謙女。詩名廣寒。

吳山

字文如。金陵人。

周蘭秀

字弱英。吳江人。沈媛之女。

楊若仙

嗣考。

許氏

未詳。

黃嗣真

字玉孃。金谿人。

黃幼藻

字漢薦。莆田人。

姜氏

新建姜方伯孫女。

劉玄芝

字秀生。金陵人。

朱斗兒

號素娥。畫山水小景。陳魯南授以筆法。與陳聯詩。有芙蓉明玉沼。楊柳暗銀堤之句。

朔朝霞

金陵妓。

周青霞

杭州妓。

趙麗華

字寶英。

鄭妥

名如英。字無美。妥小名。十二行也。金陵舊院。首推鄭氏。妥晚出。韶麗驚人。冒伯麟集鄭妥與馬湘蘭趙今燕朱泰玉之作。爲秦淮四美人選稿。

馬珪

字文玉。善謳善琴善畫。春日遊西湖。作憶舊詩四章。武林詞客。屬和盈帙。皆莫能及。

馬如玉

字楚嶼。本張姓。家金陵南市樓。從假母之姓爲馬。修潔蕭疎。無兒女子態。熟精文選唐音。善小楷八分書及繪事。傾動當時士大夫。亘史曰。北里名姬。多倩筆於人。惟如玉不肯。卽倩人亦無能及玉也。

崔嫣然

字重文。少字媚兒。同母姊倩。字景文。曲中稱曰二文。嫣然少機警。知文史。所居有幻影閣。書帙橫陳。香茗精潔。程孟陽稱爲北里女士。

郝文珠

字昭文。才藝殊絕。談論風生。有俠士概。馮祭酒開之。有酬文珠詩云。虛作秣陵遊。無因近莫愁。其爲名流契慕如此。

沙宛在

字嫩兒。自稱桃葉女郎。有蝶香集。閨情絕句一百首。

薛素素

吳人能畫蘭竹。作小詩。善彈走馬。以女俠自命。少遊燕中。與五陵年少挾彈出郊。連騎遨遊。觀者如堵。廣陵陸弼爲挾彈歌贈之。自是名噪江湖。

謝五娘

潮州女子。有讀月居詩一卷。卷中有寄外赴試詩。而懷人寄友之章。不一而足。又有詩辭。父受二聘云。卓犖黎生先有聘。風流鍾子後相親。桃花已入劉郎手。不許漁人再問津。則其風懷放誕。固可知也。

羽孺

卽素蘭。姓名說載前集。

翠樓二集

淮南劉云份青夕選訂

宮詞

沈瓊蓮 字瑩中

尙儀引見近龍牀。御筆親題墨色香。幸得唱名居第一。沐恩舞蹈謝君王。
薰柳青青燕子愁。萬條齊水弄春柔。東風不與閒人贈。誰去江南水上洲。

折楊柳

楊文儷

昔去臨岐路。柔黃綴樹生。今來歸故里。暗綠與樓平。花起輕飄絮。條聲巧轉鶯。因看攀折處。記取別時情。

述懷

錢氏女

靜守深閨歲屢遷。蕙心蘭質自娟娟。撥琴不奏桑門曲。揮翰寧題葉上聯。龜灼已知無吉

兆鵲橋那得有良緣。芙蓉只合含霜死。肯向西風怨暮年。

暮春

馬閒卿字芷居

紗窗睡起藹朝暉。滿院鶯聲花正飛。閒裏不知因甚事。春來容易送春歸。

芝城寄女

方孟式 再見

莫問花開花落時。幽芳不必鬪濃枝。晝長無事香銷篆。朝誦楞嚴暮誦詩。

憶舊

一別江潭月幾圓。相憐人面不如前。依稀舊日芳菲在。秋雨梧桐十二年。

古意

方維儀

曉來望天氣。山頭飛鳥還。空餘一片石。相對白雲閒。

陌上折楊柳。春風吹斷腸。音聲不可見。江水渺茫茫。

酬子英姪女

夜靜行舟息。蘆花起浪聲。蓬窗明月照。多少別離情。

月夜懷妹

空林隕葉暮鴉啼。雲漢迢迢隔皖溪。夜發蒼梧寒夢遠。楚天明月照樓西。

春雨

春江新雨到窗西。雲暗山光遠樹迷。零落梨花飛不盡。故園應有鷓鴣啼。

獨坐

獨坐空階清露涼。夜深有影落衣裳。砧聲何處頻催月。照見愁人欲斷腸。

讀測量書

周玉簫

測量精義學多般。遠闊高深指顧間。結髮結腸無底止。試量恨海與愁山。

桃花

鄭允端 字正淑

細雨春寒江上時。小桃欹樹出疎籬。從教一簇開無主。終不留題崔護時。

答林鴻

張紅橋

芙蓉作帳錦重重。比翼和鳴玉漏中。共道瑤池春似海。月明飛下一雙鴻。
桂輪斜落粉樓空。漏水丁丁燭影紅。露濕暗香珠翠冷。赤欄橋上待歸鴻。
橋外千花照碧空。美人遙隔水雲東。一聲寶馬嘶明月。驚起沙汀幾點鴻。
草香花暖醉春風。郎去西湖妾向東。斜倚石欄頻悵望。月明孤影笑飛鴻。

留別

牀頭絡緯泣秋風。一點殘燈照藥叢。夢吉夢凶都不是。朝朝望斷北來鴻。
井落金瓶信不通。雲山渺渺暗丹楓。輕羅露濕鴛鴦冷。閑聽長宵嘹唳鴻。
寂寂香閨枕簟空。滿階秋雨落梧桐。內家不遣園陵去。音信何緣寄塞鴻。
玉筍雙垂滿頰紅。關山何處寄書筒。綠窗寂寞無人到。海闊天高怨落鴻。
袞寒翡翠怯秋風。郎在天南妾在東。相見千回都是夢。樓頭長日妬雙鴻。

半簾明月影瞳瞳。照見鴛鴦錦帳中。夢裏玉人方下馬。恨它天外一聲鴻。
一南一北似飄蓬。妾意君心恨不同。他日歸來也無益。夜臺應少繫書鴻。

寄木元經

田娟娟

聞郎夜上木蘭舟。不數歸舟祗數愁。半幅御羅題錦字。隔牆裏贈玉搔頭。

病劇寄木生

楚天風雨繞陽臺。百種名花次第開。誰遣一番寒食信。合歡廊下長莓苔。

送夫

斗娘

匹馬離違日。黃花正晚秋。君心宜自適。莫爲妾多憂。

遠逐風塵路。遺書滿目愁。思君不成寐。月上看牽牛。

寂靜聞天籟。愁眠覺夜遲。遙憐江海別。殘月夢君時。

因緣嗟不偶。離別事堪傷。縫緝多辛苦。君看莫易忘。

題西子浣紗圖

董氏字少玉

白石澄流水。春來坐浣紗。青楊愁隱鳳。玄髮亂飛鴉。倚玉渾無色。傳神賴有花。蛾眉如淡
帚。不在野人家。

送別

相看疑是夢。別恨好誰知。驛路花將發。離亭柳漫垂。淺渚孤舟泊。深山匹馬遲。凭闌無個
事。日日數歸期。

飛盡楊花別。相看不自由。征人望絕塞。少婦倚空樓。易換春前色。難聽角裏愁。無情江上
水。日日送行舟。

子夜歌

涼風吹北窗。槐陰深幾許。帶露摘荷花。笑共鴛鴦語。

寄夫在岢嵐

流落客邊州。刀環在馬頭。莫憐楊柳色。管取只封侯。

送生後還李樓

呼文如

莫問天台落日愁。桃花片片水悠悠。寒窗一閉秦簫月。惹得人呼燕子樓。

寄生詩

長門當日歎浮沉。一賦翻令帝寵深。豈是黃金能買客。相如曾見白頭吟。

別後

不堪風雨夕。憔悴在孤舟。淚與波聲濕。燈縈暝色秋。夢猶疑赤壁。目已斷黃州。此際君知否。湘妃自可求。

晚晴

周 潔字玉如

久雨愁無極。斜陽喜乍開。樹披殘靄出。山挾斷雲來。的歷穿花徑。逶迤過渚臺。更須林月上。清賞一追陪。

登樓

憑闌一望白雲重。松竹蕭森暮露濃。樹外連灘流不斷。依稀如聽秣陵鐘。

秋閨夢戍詩

馬氏

夫重封侯妾愛輕。漫歌琥珀戀寒更。游魂自苦人何在。芳草無言路不明。彷彿玉關傷舊別。徘徊油幕訂新盟。夢回簷馬迎風處。猶是沙場劍戟聲。

屈盡纖纖鎖盡眉。廣寧消息竟遲遲。十年笑語燈前事。千里關山枕上期。萱草旣零堂北雨。梅花將發嶺南枝。青春儘伴寒更老。再莫相逢日落時。

秋雨絲絲秋夜涼。新愁還比舊愁長。落花落葉和燈落。荒隴荒雲并歲荒。白晝想君歌白苧。黃昏愁妾夢黃梁。何時息馬嘶歸馬。洗盡詩腸換酒腸。

仰窺北斗認遼陽。一夕西風引夢長。羅襪路生難問信。石城烟繞怯停裝。草青自判身爲塚。塞黑俄驚骨似芒。正好相關商別恨。曉鴉啼散一天霜。

商氣蕭森下紫虛。亂飄松葉覆茅廬。病懷不耐秋多感。習夢還來路已迂。記里怕聞廂上鼓。指南遙憶海邊車。斷魂杳靄誰驚覺。葉落空山響木魚。

自昔良人愛遠游。百懷堆積在眉頭。一鈞斜月臨蒲榻。滿枕離魂繞戍樓。隴右谷剛過子午。川南峽已度春秋。夢迴每爲多情惜。李廣從來不拜侯。

贈王蕙芳

屠瑤瑟 字湘靈

粧鏡朱顏借玉荷。初勻眉黛拂雙蛾。雲英舊有藍橋約。一夜香風到大羅。

送外

蕭蕭梧葉作秋聲。況復征人欲遠行。此去西冷烟草碧。月高霜落水痕清。

秋夜贈七襄

蘋花紅蓼趁江斜。暮色芙蓉映彩霞。常得與君酬白雪。夜闌清露在蒹葭。

睡蝶

沈天孫 字七襄

一夜和風遍海棠。家園蝴蝶拂柔桑。飛隨芳樹霞衣好。倦宿琪花粉夢香。似與名蕤分艷色。不堪清露濕秋裳。因風又度雕闌去。卻伴游絲過石梁。

贈蕙芳

比翼雙飛宿上林。流蘇掩映合歡衾。香奩賦就憐蘇蕙。織出迴文寄錦心。

坐雨有懷

高樓寂寞坐來清。春雨蕭蕭落暮聲。沉水香殘寒漏永。夢魂獨逐片帆輕。

暮春卽事

全少光 字如玉

經時渾暖候。映日有青枝。花落蜂猶戀。春歸草不知。竹苞仍个个。柳線亦絲絲。獨憶深閨裏。柔風入暮時。

春日齋居

袁九淑 字君燧

妝成出幽閣。芳徑寂無譁。林潤涵朝雨。窗明帶曙霞。鶴棲醒酒石。鳥啄睡香花。長笑耶谿。

女春風自浣紗。

燈詞

家家行樂管絃催。火樹千枝向夜開。見說南隣祠太乙。笑聲一片踏歌來。

東園踏青

鄧氏

芍藥叢邊露氣沉。步隨芳草共幽尋。桃花薰日紅濃淡。柳葉迷煙翠淺深。何處香泥忙社燕。誰家晴檻噪時禽。悄寒羅襪渾無力。斜倚東風碧樹陰。

春閨詞

王虞鳳再見

融和天氣喜初晴。爲愛簪花却放針。玉枕夢回人寂寂。瑤琴揮罷院沉沉。綠鴛戲水穿荷影。紫燕啣泥織柳陰。晝靜金爐香欲盡。推窗滿地落紅深。

舟發羅水

劉苑華

門前瞬息是天涯。剛是辭家便憶家。試問羅江幾了水。送人雲裏拾春花。

聽船梢婦打歌用吳歌體

畫船女兒打吳歌。縹緲風烟莎接麼。却與槳聲相應節。到來只是喚哥哥。

蚤春憶外

沈紉蘭字問靚

映日初花隔檻明。春風嫋嫋透寒輕。傷心怕聽枝頭鳥。莫向王孫歸路鳴。

秋日舟中懷孟晚

雨後平蕪色更青。蕭蕭笛韻不堪聽。芙蓉江上秋如許。好憶前年共採菱。

和會稽女子

黃雙蕙字柔嘉

誰道臨風半是塵。飄零猶惜異鄉身。梅花不入愁人眼。能得山陰一刻春。
少婦何堪學遠遊。陟阿又問水悠悠。癡心只寫燈前恨。自古芳容幾白頭。
憔悴天涯對阿誰。若爲多露獨含悲。空憐子夜孤亭淚。盡作霜楓帶雨垂。

客中聞子規

黃淑德字柔卿

陌上柳條新。逢春倍惜春。忽聞啼杜宇。愁殺未歸人。

七夕

鵲駕成橋事有無。年年今夕會星娥。時人莫訝經年隔。猶勝人間長別多。

秋晚

柳外慵蟬噪晚霞。風牀書卷篆煙斜。凭闌自愛秋容淡。閑數殘荷幾朵花。

泛月鷺湖

落葉報秋聲。飛帆景自清。林疎垂露重。風靜暮潮千。蛩語牽人怨。鳥啼動客情。娟娟松外月。偏向別離明。

步月

項蘭貞 再見

步月下庭除。螢飛花影側。露下不知寒。鳴蛩動秋色。

步月下庭除。青苔印鞋濕。行吟月轉西。覓句還獨立。

舟中晚眺

片帆天際闊。落日遠山青。隱隱風前笛。行人不忍聽。

初入南國

武氏

南州初入便神清。步步新秋送水聲。金縷兩行濃夾柳。灘雲如染照山明。

晉臺獨夜

晉臺玉鏡照春流。綠草朱鱗步步幽。百子帳頭香自暖。銀床歸坐夜懸鈎。

七夕

是夜陰

鄧氏字太妙

誰遣鵲梁貫絳河。靈妃應是蚤停梭。雲鬢待駕輕飛輦。月鏡催粧淺步羅。絳氏鳳聲方未已。漢庭鸞使更相過。佳期只恐箕星妬。風雨休教浪作波。

春閨

劉雲瓊

百舌五更啼。啼聲驚繡闥。王孫歸未得。芳草自萋萋。

寄外

梅生

落葉滿庭階。秋風吹復起。遙憶別離人。寂寞何堪此。

風

田玉燕 字雙飛

春山爲捲白雲飛。繞樹花飄香點衣。蘋末搖青度珠箔。柳邊分翠透羅圍。

夜柳

依依柔態不勝飄。幾度東風拂露條。何事姮娥偏妬影。却教暗裏舞纖腰。

春日有感

虞淨芳

燕子雙雙遶畫梁。殘紅點點落西廂。幾朝別後心如醉。長漏催更欲斷腸。

秋夜寄元慶二女

王鳳嫺 再見

霜寒烏鵲繞南枝。孤客那堪聽漏遲。三處離愁憑一夢。滿枝愁緒屬雙眉。賦成宋玉悲秋日。琴廢相如病雨時。黃葉打窗添不寐。屋梁落月伴遐思。

廢琴

半生花月病中緣。閑理絲桐指下玄。腸斷廣陵聲已絕。蕭蕭風雨弔哀絃。

拋書

芸窗嘗蠹五車書。螢雪晨昏樂自餘。可惜謝娥拋卷後。黃雲白草掩精廬。

對鏡

周慧貞字挹芬

拂鏡試新粧。無言暗自傷。但看花上露。愁斷九迴腸。
無限傷心事。朝來一照中。自憐顏色減。不似舊時紅。

七夕

雙星暗度巧雲飛。玉漏聲殘月正西。秋思不堪凝獨立。數竿風竹小牕低。

私語

董氏

欲語語還歇。道儂儂不知。寸心千萬結。天邊月一絲。

無衣

蚤起臨粧粉黛消。攬衣欲着又還拋。梅花點雪春衫薄。豈爲多情鬪楚腰。

春日小窗

遲日停針倚北窗。飛花裊裊過東墻。不知我是愁眉婦。也點春來一片香。

蓮

張嬾婧 再見

人知蓮蕊香。誰識蓮心苦。爲憂秋風來。搖落無人主。

秋夜

愁多自是夢難成。不爲床前蟋蟀吟。蟋蟀也憐秋寂寞。邀予伴月共三人。

夜吟

繞天落葉倚繩床。苔砌寒蛩泣夜長。閑把玉簪敲檻竹。棲鴉驚起月如霜。

七夕前一夜

茶鐺活火煮新秋。愛月先登乞巧樓。欲駕鵲梁猶未許。今宵更勝隔年愁。

梅花

翁孺安 字靜和

影落空庭照玉卮。清人肌骨月明時。樽前傳出東君信。須折南樓第一枝。

無題

袁彤芳 字履貞

陳宮破鏡還重照。弄玉瓊簫却共吹。何事彩雲飛鶴下。年年不作一雙歸。

多情常是因花瘦。獨坐閒吟晝掩扉。好句似從天外得。春心時在夢中歸。

木蘭花發最繁枝。錦字何繇寄我思。一自武陵人別後。至今只有夢相期。

彩筆漫題幽曲怨。錦箋難寄辟寒香。故人爲我應憔悴。我爲思君泣夢長。

偶成

黃 鴻 字鴻耀

落日啣山轉。星稀月漸明。東風不爲吹愁去。欲訴幽懷誰與評。

獨好

吳 山 字文如

月自移雲出。風從拂樹來。空庭人子立。瘦影共徘徊。

野望

周蘭秀 字弱英

眺高人籟絕。鳥鬪落雲忙。窗冷香浮幕。帷閑夢是鄉。煙光攜柳靜。霞氣覆苔蒼。野致應如許。玄心若箇長。

偶述

愁多不堪語。塵緒縷千絲。花落空相負。秋情浪蝶知。

閨思

花影搖牕曉色鮮。燕泥斜墮雨風天。寒深小帳春無緒。衣捲殘香憶夢眠。

曉起

曉風疏柳掛樓西。霧合秋窗半欲迷。衾冷不堪重索夢。黃鸝飛向隔花啼。

舟泊西陵話蘇小有感

楊若仙

愁絕西陵渡。沿洄未可親。簾鉤虛夜月。油壁委荒塵。松解心頭結。嵐添鏡裏顰。年年春草碧。芳氣尙撩人。

七夕

許氏

深閨無夢到星河。花月參差恨轉多。底事摻摻雙素手。長年孤影伴寒梭。

漁村唱晚

黃嗣真 字玉孃

網影垂簷江樹空。晴川隱映落霞紅。欲知千古滄浪恨。盡在斜陽欸乃中。

雨中看紫芍藥

黃幼藻 字漢薦

粧樓初下自傾城。冉冉香生繡戶清。厭說廣陵春色暮。胭脂和淚雨中傾。

恨白芍藥不開

萬種花開鬪曉紅。含羞無語倚東風。素粧不理因誰倦。一段春藏粉黛中。

登樓望海

遙山層疊海雲開。浴鷺飛鷗自去回。春水茫茫天不盡。片帆浮動碧空來。

山居

姜氏

何必入山深。居然似漢陰。雨殘雲在竹。野曠日平林。負郭多幽事。爲農長道心。芸牕開卷罷。多是聽鳴禽。

冬夜

劉玄芝 字秀生

臘雪初殘睡欲遲。寒宵久坐有冰澌。侍兒忽報三更月。已上梅花第一枝。

吳江舟次

王微 再見

昔年從此去。寒雨共孤舟。有病淹歸旅。無詩記遠游。半窗殘月夢。幾樹斷煙愁。未抵荒江外。相思一夜秋。

夜歸憶鄰舟女郎

共春商略夜無眠。拾得閒愁在水邊。倒似夢中曾見過。一枝春影倚寒煙。

紀夢

孤枕寒生好夢頻。幾番疑見忽疑真。情知好夢都無用。猶願爲君夢裏人。

冬夜懷宛叔

寒燈怯影黯疏幃。霜月留魂露未晞。我夢到君君夢我。好遲殘夢待君歸。

送人

朱斗兒 號素娥

揚子江邊送玉郎。柳絲牽挽柳條長。柳絲挽得行人住。多向江頭種兩行。

送人

朔朝霞

秋風江上送君舟。落葉江楓總別愁。解纜不知人去遠。凭闌猶倚夕陽樓。

病中賦別

周青霞

寒林落日倚枯藤。淚洒清溪紅欲冰。此際與君爲別去。好尋松柏到西陵。

答人寄吳箋

趙麗華 字寶英

感君寄吳箋。箋上雙飛鵲。但效鵲雙飛。不效吳箋薄。

話別

道是愁無極。還教仗酒魔。誰知醒時意。說向醉中多。

采蓮曲

景翩翩再見

十里湖如鏡。紅蓮个个香。大姑先戲水。蕩散兩鴛鴦。
小姑采蓮花。莫漫采蓮藕。采藕柳絲長。問姑姑知否。

寄遠

驅車一以疾。相見何遲遲。思君平昔意。不似薄情兒。
江上望歸櫂。君歸未有期。試看圓缺月。是儂斷腸時。

舟發沙溪

青溪九曲白雲鄉。溪上行舟欸乃長。誰把金丸打野鴨。偏驚幾處睡鴛鴦。

四月一日雨

九十春光已暗過。雕闌花信竟如何。應知雨意和愁約。雨到牀頭愁亦多。

泰寧病中

春日顰眉長閉門。東風吹雨倍銷魂。不知野外垂絲柳。青入南頭第幾村。

憶故居

趙今燕再見

柳絮春泥玉壘封。珠簾深鎖暮烟濃。分明記得雙棲處。夢繞青樓十二重。

閨夢

朱泰玉再見

清霜飛急漏聲遲。遙夜孤幃憶別離。幽夢欲成明月去。却憑何處炤相思。

芭蕉雨

滴破愁中夢。聽殘葉上聲。新詩題未得。偏送別離情。

留秋送劉冲倩

鄭妥字如英

我欲留秋住。寒衣不忍裁。歸期何用速。尙有小桃開。

春日寄懷

沉沉無語意如癡。春到牕前竟不知。忽見寒梅香欲褪。一枝猶憶寄相思。

雨中送期蓮生

執手難分處。前車問板橋。愁從風雨長。魂向別離銷。客路雲兼樹。粧樓暮與朝。心旌誰復定。幽夢任搖搖。

秦淮別怨

秦淮二月新柳黃。折柳貽人人斷腸。可憐嫋嫋秦淮柳。今朝又上離人手。離人手把柔條看。柔腸低拂紫騮鞍。紫騮欲嘶人落淚。誰當此際猶能醉。綢繆執手問前期。蓮子花開是到時。但恐見蓮君不見。令人空憶桃花面。青青草色長干道。偏使離人顏易蠹。秦淮上流卽豐溪。我心隨水不復西。請看不斷秦淮水。有心寧不相思死。

春日汎湖憶舊

馬珪字文玉

一隻蘭舟幾日湖。同心暗結事難圖。比來西子應無主。何處羅敷自有夫。沙暖燕歸春閣早。醉餘人別莫橋孤。年年只解看花到。草色今朝獨弔蘇。

若箇釵行憶昔招。曲池阡木漸蕭蕭。浪翻金錦猶餘麗。花落胭脂尙帶嬌。綺席已更蓮葉舸。彩繩又掛綠楊橋。相逢此後忻非晚。盪槩從君不記朝。

飲雨花臺賦落葉

馬如玉字楚嶼

登眺臺千尺。論心酒一尊。青霜侵樹杪。丹葉舞江村。逐浪同浮梗。隨風欲斷魂。榮枯何足歎。此日幸歸根。

別黃玄龍

崔嫣然字重文

九月江南似小春。偷春花鳥帶歸人。粧樓直對長干道。愁見行車起暮塵。華裾賦別酒初醺。水調吳歌夜入雲。此曲由來能解恨。一時悽切半緣君。

送人還閩

郝文珠 字昭文

一曲春風酒一卮。渡頭楊柳不開眉。從今海路三千里。有夢爲雲到也遲。

閨情

沙宛在 字嫩兒

白燕雙雙入幕頻。梨花香遍雪爲茵。夜來縱有游仙夢。不作烏衣國裏人。
朝來報道牡丹開。拚取紅紗護錦堆。癡蝶貪香尋不得。遶兒衣袂百千回。

懷人詩

薛素素

良夜思君歸不歸。孤燈照客影微微。攜來獨枕誰相問。明月空庭淚濕衣。

秋日過吳門感舊

周文 再見

香殘帶緩不勝愁。又見蕭條一片秋。身到故鄉翻是客。心惟明月許同舟。數聲新雁凌江下。幾點寒鴉逐水流。遮莫平生多少恨。閒吟欹枕更悠悠。

有懷

捲簾何所思。獨立數歸鳥。不恨落日遲。惟憐君去蚤。
醉罷見明月。照我還照君。如何君不見。只見天邊雲。

暮春

曾共看花發。無端又落花。春歸君亦去。誰與惜年華。
坐起愁如織。空齋但寂寥。不關風雨妬。春色爲誰凋。

贈友赴南都

西風一葉白。門秋萬里那。知人倚樓。寂寞漫憐桃。葉渡管絃能起故鄉愁。

春日偶成

謝五娘

乳燕噙泥春晝長。倚闌無語立斜陽。桃花紅雨梨花雪。相逐東風過粉牆。

暮春

杜鵑啼血訴春歸。驚落殘花滿地飛。惟有簾前雙燕子。惜花噙起帶香泥。

初夏

啼鳥聲中午夢回。篆香重撥已成灰。東風似恨春歸去。吹送楊花入戶來。
庭院薰風枕簟清。海榴初發雨初晴。香銷夢斷人無那。聽得新蟬第一聲。

感懷

四面簾垂碧玉鈎。重重深院鎖春愁。天涯行客無歸信。花落東風懶下樓。

琥珀枕

梁小玉

仙苓千載赤脂殷。雕琢移來湘簟間。從此不須沾小草。長陪清夢白雲閒。

篆章

揮灑霞箋寄隴頭。雙鈴題處紫雲浮。兒家曾掌司花印。總領曾城十二樓。

落花

羽 孺字素蘭

一自相從十八姨。春山游遍故枝移。撲簾時助嬌娥繡。點硯常窺騷客詩。國色常存衣帶

引清香不改月明知。蝶來北苑蜂南去。誰向樓頭話別離。

纔向詩人又酒人。半留牕屋半鋪茵。自來姣好根荑薄。却爲輕狂轉盼頻。任是穠華迎淑景。也應飄泊到殘春。青陽若得常如舊。子建何須賦洛神。

看美人放紙鳶

楊 宛再見

愁心欲放放無由。斷却牽絲不斷愁。若使紙鳶愁樣重。也應難上最高頭。
羨伊萬里度晴虛。自歎身輕獨不如。若到天涯逢蕩子。可能爲報數行書。
薄情如紙竹爲心。辜負絲絲用意深。一自飛揚留不住。天涯消息向誰尋。
時來便逐浮雲去。一意飄揚萬種空。自是多情輕薄態。佳人枉自怨東風。

聞雁

萬里翩翩度碧虛。月明送影意何如。也知一向郎邊過。自是多情少寄書。

促織

嘒嘒孤韻入秋林。切切幽心語夜深。慣不憐人成好夢。却憑好事戲相尋。在牀在戶身難主。添恨添愁巧自深。何不蚤從金籠住。傍人枕畔共哀吟。

病中

坐臥掩虛堂。香風繞筆床。咏花生冶豔。題柳遂輕狂。事少人偏倦。情多夢不長。年年愁病日。却笑爲詩忙。

憶遠曲

隱名

揚子津頭風色起。郎帆一開三百里。江橋水柵多酒罇。女兒解唱山鷓鴣。武昌西上巴陵道。聞郎處處經過好。櫻桃熟時郎不歸。客中誰爲縫春衣。陌頭空問琵琶卜。欲歸不歸在郎足。郎心重利輕風波。在家日少行路多。妾今能使烏頭白。不能使郎休作客。

標梅怨

白藕作花風已秋。不堪殘睡更回頭。晚雲帶雨歸飛急。去作西窗一夜愁。

贈別

牽君衫袖爲君歌。半入陽關半渡河。纔唱一聲雙淚落。十年無奈別離多。

寄情

畫梁春燕須同宿。蘭浦雙鴛豈獨飛。長恨桃源諸女伴。等閒花裏送郎歸。

題芙蓉亭

芙蓉花發滿江紅。盡道芙蓉勝妾容。昨日妾從堤上過。如何人不看芙蓉。

四時迴文

花枝幾朵紅垂檻。柳樹千絲綠遶堤。鴉鬟兩蟠烏裊裊。徑苔行步印香泥。
高粱畫棟栖雙燕。葉展荷錢小疊青。腰細褪裙羅帶緩。銷魂暗淚滴圍屏。
明月晚天清皎皎。凜霜晴霧冷悠悠。情傷暗想閒長夜。淚血垂胸鎖恨愁。
天冷雪花香墮指。日寒霜粉凍凝腮。懸懸意想空吁氣。夜月閒庭一樹梅。

翠樓新集 目錄

陳結璘四首

朱德容四首

張德蕙二首

祁德漭三首

王煒十首

章有湘一首

章有渭一首

李似姒六首

李因四首

吳肫一首

丁啓光一首

李琬一首

彭琰二首

徐簡二首

吳貞閨二首

吳靜閨四首

徐安吉四首

郭瑪三首

韓佩一首

韓宛二首

浦映淥四首

巢麟徵二首

鄭慧瑩一首

胡氏一首

王靜淑一首

瞿珍六首

王芳與四首

黃荃一首

張靜紈二首

張在貞二首

袁潔三首

王琛一首

王靜言一首

陶履坦一首

時嫻四首

戴淑貞一首

顧若璞五首

王德嘉四首

孫蘭媛一首

吳湘一首

宋蕙湘二首

吳芳華一首

葉文三首

吳氏一首

尼靜照二首

容湖女二首

馬淑禧一首

高幽貞一首

錢宛鸞八首

季嫻十首

王毓貞三首

柳聲五首


張婉二首

胡蓮一首

范璣一首

喬容二首

翠樓新集目錄終



翠樓新集諸名媛族里

陳結璘

字寶月。常熟人。瞿公稼軒先生之子婦。孝廉伯申之室也。工繪山水。善絲桐。所著有藕花莊集行世。

朱德容

字趙璧。山陰人。歸文學祁班孫。太師朱公燮元之孫女。太保世培公子婦。其爲詩以麗情密藻發其胸中奇秀。非尋常閨閣可及。

張德蕙

字楚纓。山陰人。適文學祁理孫。鼎元文恭公元抃之孫女。亦世培公子婦。其詩高渾壯麗。有大家風範。

祁德蒞

字湘君。世培公女。年十三四。卽韶慧絕人。黃皆令嘗亟稱之。母商夫人。爲香籤名宿。咏虞姬云。此夜美人歌舞地。遙看白水漫江沙。殆警句也。

王煒

字功史。一字辰若。太倉人。四川副使叔元公孫女。海鹽陳緯度之室。博學敦古。詩多名句。顧伊人稱爲笄幃中道學宿儒。所著有燕譽樓集。

章有湘

章有渭

字玉筐。華亭人。適皖桐孫振公。有澄心堂詩行世。荆隱道人靜雲爲之序。荆隱侯武功母。夏彝女也。渭字玉潢。適江定文學侯研德。與姊並擅才名。

李似姒

字莘子。興化人。其詩雋逸蕭疎。如新桐初引。青山照人。

李因

字是庵。海寧人。光祿葛徵奇副室。翰墨林中。可推祭酒。

吳拙

號冰蟾子。華亭人。適嘉善曹允明。詩多古意。矯矯如千丈松。

祁修嫺

山陰人。吉光片羽。清麗絕塵。

丁啟光

字步孟。山陰人。通州別駕丁承芳之女。配朱元德。長於古體。而律詩尤妍麗多風。

彭琬 彭琰

字玉映。海鹽人。進士彭期生妹。浙江總兵馬孟驊媳。琰字幼玉。適文學朱化鵬。閨中酬和。

洵稱雙璧。

徐簡

字文漪。嘉興人。新安吳于庭副室也。于庭遊粵東。留文漪于吳門。或曰。今歸楊中翰矣。所著有香夢居集。

吳貞閨

吳靜閨

字首良。吳江人。適曹村金氏。書法遒勁。尤精琴理。妹靜閨。字佩典。適汝南周氏。幼慕黃庭。得其筆意。與姊氏並工詩。如春蘭秋菊。各極其致。

徐安吉

字子貞。上虞人。少司馬徐公人龍女。王玉映弟。玉鬯婦也。詩天矯離奇。無閨中纖媚之習。

郭璿

字璿汝。長洲人。適埭川顧氏。畫學趙文淑。花鳥推逸品。書法大小俱有古致。作詩授筆立就。稱倚馬才。

韓佩 韓宛

字照玉。婺州人。妹宛。字湘烟。八歲讀離騷。十二能詩。

巢麟徵

字淑只。武進人。進士五一公女也。適文學黃初子。初子以詩文名世。淑只實與頡頏。里中豔稱之。

鄭慧瑩

字明湛。餘姚人。山西僉事鄭公之尹女。適樞部主政倪會覃。文正公鴻寶之子婦也。詩詞俊妙。有因風吹去。帶月浮來之况。

胡氏

山陰人。配大金吾吳國輔。丁睿子言。其詩甚富。惜不多見。

王靜淑

字玉隱。號隱禪子。山陰人。宗伯季重先生長女也。適文學陳樹勳。早寡。其妹玉映。驚才艷質。當爲香簾第一。而玉隱詩亦幽閒挺秀。有孤雲出岫。野鶴橫空之態。

瞿珍

字若婉。常熟人。姿色傾城。雅好舟居。嘗輕舸蕩槳。往來鸞溪虎阜間。硯匣筆牀。青琴柔翰。閨閣儒林。傳爲韻事。鄒流綺贈詩云。慧似文姬與謝妹。豔非趙姊卽楊姨。卽曰過譽。然足當斯語。亦可想見其人矣。所著有月吟等刻。

王芳與

杭州人。太史嚴子餐配也。詩才高妙。堪與夫匹。想六橋三竺之秀。所獨鍾耶。

黃荃

字逸佩。太倉人。太學奉倩女。大參明宇公孫女也。工書善琴。歸文學王天路。詩多高素。不爲閨房體。有蕉隱居集。

張靜紈

字文琳。太倉人。本王姓。文學惠常女。太史張公天如內姪女也。張撫爲己女。因姓焉。適儀部張公受先之子汝上。

張在貞

字蕙琬。天如先生女也。通經史。工琴書。與姊文琳倡和。有月窗合草。

袁潔

嘉定人。年二十而寡。黃靜御稱其詩幽峭清麗。絕不猶人。

王琛

字洛珍。烏程人。文學沈宋圻副室。

王靜言

字淑蘭。文琳胞妹。

陶履垣

字固生。會稽人。適大將軍朱駟元。

時嫺

字宜幽。常熟人。給諫修來公女。適顧揆。

戴淑貞

吳縣人。文學殷季修室。詠物諸詩。工麗獨絕。

顧若璞

錢塘人。諸生黃東生室。大參貞父公子婦也。博學能文。以節烈著。其詩盡洗寒鴉枯木之習。獨存黃鐘大呂之音。聞有全集。恨未見之。

王德嘉

字家令。武進人。跡希李杜。步恥鍾譚。豈非香閣異才。

孫蘭媛

字介晚。嘉興人。文學陸涓之室。

吳湘

字若耶。江都人。參軍范崑崙副室也。詩琴畫奕。迥絕時流。

宋蕙湘

金陵人。年十四歲。選入宮中。後爲兵掠。其題壁詩哀怨悽惻。和者如雲。畢竟遜原唱爲最。

吳芳華

武林人。文學康某婦也。結褵三月。兵渡錢塘。從夫避地天竺。道爲官軍所獲。挾之北去。題詩旅壁。有云。後之過此者。爲妾歸謝藁砧。當索我於白楊青塚間也。見者哀之。

葉文

字素南。松陵人。善畫蘭。初配嚴某。後歸武林張繡虎爲副室。

吳氏

嘉興人銓部某之女也。才色俱絕。以所配非偶。不自檢束。致訟公庭。今流寓金陵。

尼靜照

字月士。宛平人。曹氏良家女。泰昌時選入宮。在掖庭廿五年。作宮詞百首。崇禎甲申。始祝髮爲比丘尼。

容湖女子

本良家女。爲宦室婦。詩才敏妙。篇什甚多。特以外君戒其吟咏。故不以姓字傳。茲集所載。荀鼎一巒。狐裘片腋。異旨奇溫。已可慨耳。夫女子亦問其持身何如耳。苟大節不渝。而徒以吮毫弄墨爲罪。則昔之青絲步障。爲小郎解圍者。寧置之女囚山下耶。

馬淑禧

號墨華子。會稽人。瑞州知府馬維陞次女也。與姊淑祉。並負雋才。有刻稿行世。

高幽貞

字樸素。山陰人。

錢宛鸞

字翔青。吳縣人。美姿容。工翰墨。風流儒雅。擅絕三吳。今讀其詩。如魂迷蝶枕。三更夢。腸斷花箋。一紙詩。又翠屏斜倚。思無奈。夢逐飛花過小橋。非豈自爲寫照耶。

季嫺

字靜映。泰興人。父吏部郎翁太宗伯。大弟翰林。三弟御史。夫李長昂。巡鹽御史。子淥。興化進士。近代榮貴。罕有其比。所著有雨泉龕詩行世。

王毓貞

字月妹。廣陵人。爲詩舉體皆俊。而聲情筆舌。足以發之。真閨奩妙手。所著有幽蘭閣集。

柳聲

字紫畹。華亭人。少穎異。寓落平康。色藝不羣。昔適維揚。今適天長。君矣。友人誌慨然有云。楚峽雲歸芳夢散。邗溝月在故樓空。真不勝風流雲散之感。

張婉

字小青。一字婉仙。原籍松江。今居西湖。淡粧濃抹。亦復相宜。

胡蓮

字茂生。台州人。才情絕世。所著有陟江集。

范璣

字舜華。揚州人。姿容窈窕。名噪青樓。

喬容

字雲生。金陵人。

翠樓新集

淮南劉云份青夕選訂

蕉紙

陳結璘 字寶月

函香束素碧雲叢。清影遙分几案中。信手旣堪凝黛色。可心何待襲箋紅。面紋瑩淨難沾雨。體質輕柔不耐風。漫道比來吟興減。蕭蕭無限粉牆東。

松琴

千章謾謾出林叢。鶴夢驚回碧落中。絃掛薜蘿還帶綠。匣鏗泉石暗流紅。峯頭影拂天心月。焦尾音傳谷口風。獨臥白雲餘古調。茶聲相續鳳池東。

麥浪

參差秀色出雲叢。新漲平疇縹緲中。銀捲乍迎鷗背白。雪翻斜沒雉頭紅。綸竿誤釣波心

月帆影空懸渡口風。曳杖試登晴隴望。芄芄何處辨西東。

雨絲

霏霏拂拂曉烟叢。潤綠凝香草色中。帝女自盤龍軸冷。天孫空擲鳳梭紅。廉纖隔斷秋閨月。黯淡愁添客邸風。粉濕蝶衣飛不起。低迷猶傍小牆東。

採蓮曲

朱德蓉 字超壁

綠葉羅裙一色裁。芙蓉映水兩邊開。欲將新曲頻頻唱。恐有鴛鴦飛入來。

咏虞姬

歌罷傷心淚幾行。江山旋逐楚聲亡。貞心甘向秋霜劍。不欲含情學漢粧。

愁雨

烟雨重重宿鳥驚。惜花愁聽落花聲。只今閨閣應寥寂。還憶亭臺芳草生。

寄修媽

莫捲珠簾對碧山。山邊孤鳥自飛還。如何百里相思路。惟有隨人月影間。

贈湘君

張德蕙
字楚纒

蘭房獨起遲。無語對羅幃。此意無人解。深閨未嫁時。

懷湘君

晴烟裊裊正深明。不耐春光滿院生。風送謝樓雙燕舞。月含梁苑百花輕。閨中少婦機杼
懶。陌上王孫芳草平。空有黃鶯歌伐木。無人解是斷腸聲。

秋月

祁德蒞
字湘君

高樓今夜望。惟有桂飄香。秋月臨窗間。羅衣出閣長。雁鳧雲外度。楊柳影中涼。玉砌蛩吟
處。寒宵意獨傷。

憶益姐

拈來閣上黃金線。倚遍亭前白玉欄。徒憶空園懸畫板。春風一夜杏花殘。

中秋

玉漏沉沉夜氣清。停杯愁對月光明。人間亦有嬌娥怨。難寫班姬泣扇情。

湖上詠

王煒 字辰若

爲客依山水。烟霞與夢通。月隨歌舫後。雲散舞衣中。嶺樹千重綠。湖花兩岸紅。行吟隨處好。芳艸正東風。

又

偕隱今何處。西冷足管絃。山光疑帶雨。江影欲侵天。密柳藏漁艇。飛花拂酒筵。移家令更遠。聯袂入雲烟。

病起

病餘愁見遠山橫。閉閣清吟繞榻行。對酒喜聞花有信。眠雲思伴鶴長生。月隨樹影侵書案。泉帶蘭香瀉藥鐺。莫惜貧居倍岑寂。林鶯亦自有春聲。

鄉思

不禁鄉思倚危樓。山色空濛海氣浮。風雨別來花半老。音書隔絕雁經秋。林間野鶴呼幽夢。天際浮雲帶遠愁。好寄相思與婁水。門前日日有潮頭。

西泠閨詠

澄江迴抱古城斜。一片烟雲接永嘉。爲愛好山聊住足。偶依高樹便成家。湖光潏灩侵行笈。竹影參差帶落花。聞道故人將卜隱。短衣雙挽鹿門車。

又

爐烟飄縹鬪芙蓉。樹色湖光涵太虛。燕子呢喃同作客。雲山圍合好藏書。琴聲入竹風相助。花影橫窗畫不如。莫怪藤蘿經歲月。古來泉石可安居。

秋眺

遠天薄暮蔚藍光。慵倚高樓望大荒。目斷飛鴻愁思遠。不知明月上衣裳。

新涼寄衣

西風昨夜透輕羅。猛雨翻池戰芰荷。遙憶挑燈孤館坐。秋寒偏是客中多。

春晚

鞦韆庭院落花紅。午夜香消逐曉風。殘月半簾人未起。聲聲燕語夢魂中。

秋暮

病裏閒行數落紅。雁聲啼入雨聲中。愁心一似寒林葉。百匝千回逐曉風。

馬嵬坡

章有湘 字玉筐

蜀道歸時麋鹿稀。馬嵬怕見杜鵑飛。三更雨泣腸猶斷。一枕鈴聲憶貴妃。

舟行即事

章有渭 字玉璜

曉霧迷離彩鷁輕。棹歌徐動見秋晴。臨湍鷺子亭亭立。夾岸蒲花漫漫生。遙指小山遮塔影。忽經深樹出鐘聲。晚涼不覺羅衣薄。自愛澄河片月明。

古怨

李似奴
字莘子

君恩似明月。昨圓今又缺。儂非三五時。歡情不如絕。

春歸

松花膩蝶粉。萍葉繡魚鱗。最是春情薄。無端奚落人。

闋述

自向紗寮拭鏡奩。背人學畫小眉尖。博山郵用焚龍腦。風約花香納繡簾。
次第新鴻逗碧空。碎霞鱗砌一山紅。夜來怕聽梧桐雨。枕畔蕭涼夢不工。

白頭吟

得意相如客帝都。何緣重聘茂陵姝。多情旣解長門怨。不念臨邛舊酒罏。

七夕

一尺銀河鵲髮填。巧雲居後月居前。人間休道佳期好。幾刻歡娛又一年。

七夕

李因 字是庵

殘機初了獨凭樓。河漢秋宵月一鉤。盡道雙星今夜合。年年賦別使人愁。

早發南留道中

十里烟林露未收。蕭蕭山雨報新秋。溪流不斷垂楊影。送盡年年過客愁。

鷺嶺山莊尋秋

十丈懸崖掛薜蘿。參雲風頂見嵯峨。閒搜怪石秋林晚。獨聽殘鐘曉月過。黃葉山前人跡少。白雲天際鳥聲多。冷泉亭下潺潺水。不許漁舟唱棹歌。

孤山竹閣社集

層巒秋靄護禪林。蕭瑟荷衣水氣侵。百畝野梅留鶴跡。千尋古木覆簷陰。風傳雁語鐘聲寂。露咽蟬吟樹影森。遙望西冷明月夜。欲酌蘇小酒重斟。

眺野

吳肅 字冰蟾

秋光瀟灑散平湖。白水明沙混玉鳧。近渚風生殘芰落。遠山流翠碧雲孤。籠將物色供憑眺。好拾蒼茫入畫圖。夕照漸低村樹隱。銀蟾一點漏疎梧。

賦得紅樹美人攀

丁啟光 字步孟

纖手折妍紅。鶯啼憔悴中。香腮春映日。白紵漾生風。細蕊憐雙蒂。游絲繞一叢。詰花渾不語。搔首問天公。

懷王辰若

彭 琬 字玉暎

陌上烟生碧樹枝。紫屏晝掩落花時。何當得覩雙成貌。空羨繁來道韞詩。曲徑茶香留夜月。朱欄鳥下看圍棋。三春風雨愁深淺。病骨支離無限思。

前題

彭 琰 字幼玉

碧草萋迷暗柳枝。匆匆良晤夕陽時。纖眉畫就春山色。素紙裁成白雪詩。風送花香沾去袂。鳥啼竹徑冷殘棋。歸來靜掩閒庭月。欲向清光寄所思。

攜手春風裏。堤邊柳正妍。自憐纔一晤。今別卽經年。夜雨疎燈下。梨花寒食天。多情是蝴蝶。嘗與夢魂牽。

九日

鳴蟬無語戀寒枝。正是登高病起時。忙裏不知秋色老。青山紅樹夕陽垂。

宮詞

徐簡 字文漪

紅樓昨夜醉春懷。王導當場勝賭牌。却被簾鉤輕觸損。聖恩重賜九鸞斂。

又

沉香亭子玉勾欄。植遍名花按月看。第一莫栽紅芍藥。此花開日又春殘。

讀葉昭齊詩

吳貞閨 字首良

願假青燈力。尋君愁恨篇。身何隨命薄。名豈受人憐。秋冷長門雁。春啼湘水鶉。如予遲暮在。心折畫屏前。

春暮

簾影漾清波。空庭鳥自過。楊花三月雨。春水綠萍多。

風梅

吳靜閨 字佩典

梅花紛遶戶。玉色冷蒼苔。斜影含情墜。低枝帶笑開。落疑殘雪隱。舞促暗香來。不盡相思意。窺人日幾回。

紅葉

簾映丹楓鎖暮樓。新霜點綴在枝頭。三分春色千花鬪。九十秋光一葉收。漢苑昔傳清恨去。吳江今逐冷風流。莫教吹向深閨聽。添得閒宵幾段愁。

題牡丹

窈窕還疑舊洛陽。廣陵一曲舞霓裳。綠衣天子人年少。扶醉宮中姓是楊。

南窗夜雨

雲暗松窗夜。殘燈雨碎聲。那堪孤夢醒。滴滴到三更。

古意

徐安吉 字子貞

柳色欲輕黃。朱樓人自傷。愁來無洛浦。夢去有高唐。寶鏡空懸架。榴裙驗取箱。誰書桐葉字。墳草變鴛鴦。

感秋

秋清萬點越山多。雁陣看來字若何。湖氣已經霜後白。雲光猶向日邊和。殘蕉落葉迴人夢。野菊垂花泛酒波。小胆怯愁蘇病骨。寒風相贈益輕羅。

春詞

西樓殘月子規情。幾樹梨花照水橫。自抱胡笳廊下坐。含愁撥得兩三聲。

憶外

萬木陰陰遶竹塢。月來伴妾妾思夫。人人誇月明猶鏡。試照相思得見無。

夏日

郭璠
字璩汝

不識愁何處。垂簾近曲廊。遠鶯啼柳碧。輕蝶戀花黃。攤卷藤床靜。看雲石壁涼。却憐空日
日。憔悴舊斜陽。

村居

小築編籬傍水濱。每逢涼夕月初生。淒蛩向戶可憐在。宿鳥依帷不自驚。江上湘娥愁暮
竹。人間客子賦秋蘅。蕭蕭半是傷搖落。况值高天霜露清。

遊女

珊珊楚步小橋東。笑語香微花影紅。斜過柳陰人不見。白雲滿徑一溪通。

七夕

韓佩
字照玉

天上從教別思多。東西相望意如何。自應悔作牽牛婦。贏得年年一渡河。

七夕和姊

韓宛
字湘烟

斜月涓涓掛玉鉤。鵲橋仙子會牽牛。雙星若使常相合。何用穿針上小樓。

送燕

紅襟翠袖自踟躕。最愛雙飛畫閣前。今日送君途路遠。春風相見又明年。

除夕

浦映淥 字湘青

聞昔秦淮醉管絃。今朝行李又徂燕。從今怕聽泥金信。恐住京華又隔年。

北望

聞道嚴寒向北賒。馬蹄晴雪壓黃沙。懷人正在春三月。莫認楊花作雪花。

牡丹亭

情生情死亦尋常。最是無端杜麗娘。虧殺臨川點綴好。阿翁古怪婿荒唐。

吳門讀會真記

有始無終奈若何。當年悔殺不投梭。只贏傳誦千人在。無日閨門不聽歌。

春閨曉起

巢麟徵 字淑只

明月獨愁花影細。靜來香院半留春。清缸小鼻燈苞剩。墜露初抽蕙畝新。城樹遠聞鶯喚。早石苔多爲鹿眠馴。晴烟曉起纔殘夢。好黛雙描拭墨勻。

歸舟

兩堤烟柳碧于紗。中夾茅扉三二家。數點睡鳧飛不去。月明溪漲白蘆花。

答外

鄭蕙瑩 字明滸

青鸞有信孰傳愁。目斷天涯倚斷樓。東河渡口帆千片。知道君家那一舟。

破船詩同映然子咏

胡氏

並立畫橋景物幽。梅痕草迹逐波流。小舟一似玲瓏葉。漏洩春風滿載愁。

中秋

王靜淑 字玉隱

空齋寂寂語高臥。一床秋苔色渾無跡。溪光淡欲流。塵隨紅葉落。心與白雲休。蕭瑟聞寒

雁鳴空萬籟幽。

晚感

瞿珍 字若婉

冉冉烟霞夕照中。玉窗倦繡結詩筒。春機織就雙鴛錦。粉淚拋殘薄露叢。落日寄情隨去鳥。遠山迷恨隔歸鴻。雲箋香滿人何處。一段離愁斗帳空。

有懷

燕燕鶯鶯喚奈何。鏡中斜見鎖雙蛾。偷回怨臉詞難訴。欲掩啼痕淚轉多。擁髻更誰憐好影。持觴何日辟愁魔。依依柳色催腸斷。墨淚淋漓瀕綠羅。

早起

畫眉魂欲斷。織錦縷難成。小立誰憐瘦。臨粧暗自驚。曉鶯啼破睡。東日照殘瓊。紙帳香猶剩。羅衫帶尙縈。

春雨

宵來春雨散桃花。滴破輕羅浸碧紗。眠柳垂頭拖粉淚。參差紅綠映波斜。

夜坐

星斗依稀月漸高。昏黃風弄竹蕭蕭。誰來簾外吹寒笛。偏到愁人耳畔招。

憶外留鴛湖

王芳與

柳瘦輕烟際。迎風引緒長。有愁難寄酒。無淚不關裳。芳艸遲歸棹。遙山待好粧。問君湖畔宿。幾見好鴛鴦。

題畫

藥草依巖碧。秋山出岫高。衆芳搖落盡。流水自朝朝。江靜漁鈞冷。烟深鳥夢柔。空林無月到。野艇爲誰留。

春晝

游絲似欲織愁腸。兩兩黃鸝叫夕陽。好問新苔爲誰綠。東風空自惜花香。

並頭蓮

黃荃 字逸佩

隱隱香風媚早秋。露華微濕晚粧幽。昭陽姊妹同時立。十二紅樓盡帶羞。

春晚

張靜紈 字文琳

無聊晝起不勝嗟。又見紗窗日影斜。綠暗小枝春欲盡。杜鵑啼落滿山花。

秋閨

長夜蕭蕭金井寒。深閨寂寞漏聲殘。紗窗月轉燈猶在。羅帳人愁淚未乾。

憶姊

張在貞 字蕙琬

銀河迢遞暗螢過。數點疎星別思多。遙憶繡帷人未寐。漏聲應促月明歌。

雨

空塔滴滴夜悠悠。危葉經風一半留。敲破鐘聲雲暗度。送人愁思爲兼秋。

清明

袁潔

簾捲微寒獨坐時。東風滋味病中知。梨雲未冷三春夢。杏雨爭催二月詩。愁怯花魂輕欲墮。恨消蝶骨瘦難支。不知今日江城柳。留得青青第幾枝。

有懷

西風瑟瑟怯輕羅。怕倚攔杆看雁過。暗覺秋思添一段。鳳仙臺伴落花多。

秋閨

懶向粧臺咏白頭。幾曾教去覓封侯。多情惟有秋天月。會伴離人長夜愁。

落花

王琛 字洛珍

小園春色已將闌。細雨微風吹更寒。花濕欲飛情似怯。綴來蛛網暫偷安。

枕

王靜言 字淑蘭

繡就鴛鴦臥玉人。銀床錦帳不勝春。啼鳥叫斷三更夢。斜照紗窗月影新。

春日感懷

陶履垣 字固生

蕙蕊蘭芽透碧紗。含愁寂寞度年華。可憐春色無多許。簾外香塵帶落花。

四時閨詠

時媚 字宜幽

九十春光一夢中。半晴天氣晚來融。淡粧不用胭脂染。夾岸桃花映面紅。
清涼無暑扇輕紗。小汎扁舟岸影斜。蓮浦風生香夢淺。月明炤醒一池花。
小砌梧桐落葉殘。早傳涼信覺衣單。蛩聲逼枕難成寐。剔盡銀燈夜正寒。
故園搖落鴈鴻思。又值天寒歲暮時。閨閣不知風雪冷。却嫌梅柳報春遲。

詠菊

戴淑貞

淡淡凝霜靜。疎疎帶露妍。種因處士貴。名借大夫傳。香艷嬌空谷。繁黃斷遠烟。更將秋晚節。掩映謝庭前。

美人圖

顧若璞

芭蕉掩映芙蓉褥。錦瑟瑤琴陳紫玉。牡丹的的生春風。翠幕珠簾護銀燭。美人盡日倚玉

簫粉靨含嬌不成曲。寄言簫史漫乘鸞。階前芳草年年綠。

宮詞

蓮花漏下月盈盈。還自挑燈索史評。看到漢宮人出塞。滿懷離恨一時生。

又

新裁蜀錦舞霓裳。唱徹吳歎倚玉床。贏得君王回一顧。只今猶帶御爐香。

看牡丹

落盡繁花始放紅。膩香紅粉怯芳叢。庭前一樹青梅子。遮莫傾筐怨晚風。

湖中

湖光渺渺冷烟微。汀鷺沙鳧竚不飛。恰欲抱琴輕別去。菱荷分綠上羅衣。

秋思

王德嘉

字家令

冷夢催霜曉。寒笳動遠秋。抱琴因寄恨。對月轉成愁。淚雨梧桐濕。悽懷雁羽修。江天無限

意秋色滿溪頭。

春恨

寂寂無聊簾半鈎。綠肥紅艷映層樓。鶯藏翠色迷春恨。蝶趁花疎惹暗愁。幾度停毫思去夢。一番花褪意如秋。輕紅片片隨風去。總抱閒情付水流。

山意

翠壑映山濃。高峯古寺鐘。不聞人語響。惟有落花風。

秋溪坐月

翠壑層層映碧空。一池秋色浸芙蓉。清溪坐月遲歸步。睡意應知怯晚風。

偶題

孫蘭媛 字介晚

畫簾初捲月猶扁。賸有疎香伴石屏。堤柳依然春在否。年年芳草百重青。

西泠詠

吳湘 字若耶

不解爛刀尺。隨時好看山。檐牙香篆字。湖面翠生斑。靜亦琴中福。勞因詩未珊。古人悲莫見。椎髻望躋攀。

題汲縣壁

宋蕙湘宮女

風動江空羯鼓催。降旂飄颭鳳城開。將軍戰死君王繫。薄命紅顏馬上來。廣陌黃塵暗鬢鴉。北風吹面落鉛華。可憐夜月箜篌引。幾度穹廬伴暮笳。

送旅題壁

吳芳華

胭粉香殘可勝然。淡黃彩子謝風流。但期死看江南月。不願生歸塞北秋。掩袂自憐鴛夢冷。登鞍誰惜楚腰柔。曹公縱有千金志。紅葉何年出御溝。

寄友

葉文
字素南

幾度黃昏後。懷君怯上樓。娟娟松外月。偏照別離愁。

春寒夜雨

羅袂春寒斗帳空。夢殘芳草怨東風。隔窗雨洒聲聲急。狼藉庭前一夜紅。

舟中詠

吳氏

一泓秋水浸羅衣。月色依舟淚滿裾。皓魄不隨風落去。空留怨骨伴郎歸。

宮詞

尼靜照

字月士

掬面東風只自知。燕花牌子手中持。椒房飲得金龍紙。勅寫先皇御製詩。

又

一樹寒花冒雲開。幽香寂寂映樓臺。女官爭簇傳呼近。知是鸞宮選侍來。

春夜讀史

容湖女子

城頭更欲起。鳥息樹常幽。遠月生虛夢。澄天洗舊愁。樓高春露重。花瘦暮烟稠。慷慨前朝事。明燈照水流。

別曲

長短亭前水自流。絲絲弱柳送行舟。君舟好載青山去。免使蛾眉相對愁。

感懷

馬淑禧

字支華子

曉來無力倦臨粧。睡起遲遲日影窗。忽報春光今已盡。含愁強步小迴廊。

嘲不識字

高幽貞

字朴素

小小毛君重若山。兩頭倒執暗中間。及觀識字人多累。不識字人反得閒。

秋霽

錢宛鸞

字翔青

一雨新秋候。千林暑氣收。歸雲依落照。飛葉滿荒丘。樹杪蟬聲咽。天空雁影浮。良宵清不寐。秉燭上南樓。

無題

天涯後會豈無期。鸞鏡生憎妬影時。別緒遠依雲樹杳。音書難訊雁魚疑。魂迷蝶枕三更夢。腸斷花箋一紙詩。憶得秦樓雙跨鳳。洞蕭聲咽不堪吹。

春恨

風雨閒庭鎖寂寥。又看春色望中消。翠屏斜倚思無奈。夢逐飛花過小橋。
林木蕭疎噪晚鴉。斜風欲透小窗紗。莫憐秋影偏岑寂。紅葉飛飛似落花。

秋夕懷弟

梧桐落葉響西風。天外初飛塞上鴻。今夕拈題誰共集。博山烟冷夢關東。
江南楓葉醉秋巒。十月邊城雨雪漫。縱有故鄉千兩絮。角聲吹處客心寒。

七夕

雙星遙度晚鐘初。翠羽盈橋香引車。今夕朱顏猶傅粉。來宵綠鬢定停梭。
凝凝舊恨風鳴佩。漾漾新愁雲襯裾。乞巧樓頭誰贈巧。常年空待五更餘。

芙蓉

吹來玉露濕花光。側岸芙蓉獨傲霜。綠葉不隨楓葉赤。紅英相伴菊英黃。
蜀城日照開新

錦江渚風牽醉晚粧。祇許伊人得持贈。淡烟疎雨自生香。

別潤城盟姊

王毓貞 字月妹

雙帆帶霧忽東兮。載得離愁江水悽。南北地天同此恨。春秋風雨各成題。無書可倩三山雁。有夢頻驚五夜雞。恨不身輕如燕子。飛飛掠過數峯西。

賦得秋張閨月夜風

蘆花盡白蓼花紅。無限淒其月夜風。已是愁人聽不得。空塔何事響梧桐。

柳

搖拽章臺柳萬條。時經離別贈河橋。青青願得常持手。收拾榴裙繫舞腰。

採蘭

柳聲 字紫曉

深深一片心。小閣未梳春。戲剪雙頭朶。慙慙贈箇人。

風蘭

香魂搖曳不勝愁。珍重攜來上小樓。分付封姨莫相妬。空山誰肯惜清幽。

露蘭

含珠顆顆濯芳標。色味輕清分外嬌。恰似懶妝人抱恨。木蘭亭北倚牆高。

月蘭

花香月淨正相當。不學繁枝引蝶忙。夜靜影移春砌動。淒涼和夢到書床。

雨蘭

疎櫺滴瀝雨摧花。一串芳心九畹斜。西子廟前迷杜宇。莫愁湖上濕盧家。

漢王鴛鴦枕

張婉 字婉仙

綠陰庭際影生涼。風韻何如半野堂。深入睡鄉猶未足。應耽玉枕是鴛鴦。

嘉又錦蓆

朝來雅集喜隨君。冰簟鮫綃映水雲。一卷湘紋輕似練。因懷捧硯待書裙。

東園春集

胡蓮

字茂生

得·遂·探·幽·計·閒·雲·襯·屐·飛·花·香·雜·鳥·韻·苔·翠·亂·人·衣·醉·眼·看·誰·是·狂·歌·覺·我·非·班·荆·頻·未·厭·省·對·坐·餘·暉·

真州看桃花

范璣

字舜華

江·柳·風·中·亂·桃·花·已·暮·春·扁·舟·迎·紫·燕·帆·影·逐·青·蘋·載·酒·龍·門·會·清·歌·洛·水·濱·武·陵·從·此·渡·片·片·溯·前·津·

步韻答所贈詩

喬容

字雲生

憔·悴·妝·前·夢·未·消·春·風·處·處·傍·君·輶·自·憐·弱·質·和·花·瘦·且·喜·同·心·向·月·標·未·許·白·頭·吟·司·馬·豈·堪·紅·袖·舞·雙·喬·巫·雲·一·片·江·干·遠·留·却·愁·眉·不·忍·描·

又

瞬·息·年·華·莫·浪·消·感·君·魂·夢·繫·輕·輶·已·知·燕·子·樓·頭·冷·祇·願·麒·麟·閣·上·標·秋·冉·湘·蘭·差·北·

晁春深銅雀愧稱喬。可憐碌碌烟花裏。敢効微顰也待描。

翠樓新集終

中國文學珍本叢書

第一輯 第二十四種

中華民國廿五年二月初版

翠樓集

實價國幣七角

撰者 校者 主編者 發行人 總經售

劉雲 份

施蟄存

施蟄存

貝葉山房

張靜廬

上海雜誌公司


上海總店：四馬路三二一四號

廣州支店：永漢北路二二九九號

京南支店：太平路一一四八號

開封支店：中山北街二八四號

雲南支店：土主廟街四七號



初版本1 — 2500本

國家圖書館



001101151



6

籍